

四庫全書

史部

欽定四庫全書

史部

文獻通考卷一百

二十九

詳校官編修_臣李堯棟

編修_臣程嘉謨覆勘

覆校官庶吉士_臣陳墉

校對官中書_臣高中

謄錄監生_臣王鍾岱

欽定四庫全書

文獻通考卷一百十九

鄱陽馬端臨貴與著

王禮考十四

后妃命婦以下車輦鹵簿

周巾車王后之五路重翟錫面朱總厭翟勒面績總安

車雕面鷖總皆有容蓋

重翟重翟雉之羽也厭翟次其羽使相迫也勒面謂如玉龍

勒之韋為當面飾也雕者畫之不能其韋安車坐乘車凡婦人車皆坐乘故書朱總為緹鷖或作繫鄭司農云

錫馬面錫繩當為總書亦或為總驚讀為鳧驚之驚驚
總者青黑色以繒為之總著馬勒直兩耳與兩鑣容謂
檐車山東謂之裳幃或曰潼容元謂朱總績總其施之
如驚總車衡轡亦宜有馬績畫文也蓋如今小車蓋也
皆有容有蓋則重翟厭翟謂蔽也重翟后從王祭祀所
乘厭翟后從王賓饗諸侯所乘安車無蔽后朝見於王
所乘謂去飾也詩國風碩人曰翟茀以朝謂諸侯夫人
始來乘翟蔽之車以朝見於君盛之也此翟蔽蓋厭翟
也然則王后始來乘重翟乎疏曰凡言翟者皆謂翟
鳥之羽以為兩旁之蔽重則二重為之厭則相次以厭
其本單言翟車者又不厭其本也凡言總者謂以總為
車馬之飾若婦人之總亦既係其本又垂為飾故謂之
總安車坐乘車凡婦人皆坐乘而此獨得稱安車者以
其無重翟厭翟翟車輦車之名無異物之稱故獨稱安
車也驚取鳥之驚色青黑為義容昏禮婦車有褻注云
裳幃周禮謂之容詩漸車幃裳注潼容是容潼容裳幃

檐為一物蓋漢法小車有
蓋所以表尊所以禦雨
翟車貝面組總有幄輦車組

鞞有翬羽蓋

翟車不重不厭以翟飾車之側爾貝面貝飾勒之當面也有幄則此無蓋矣如今輶

車是也后所乘以出桑輦車不言飾后居宮中從容所乘但漆之而已為輶輪人鞞之以行有翬所以禦風塵以羽作小蓋為翬日也疏曰貝面貝水物謂餘泉餘蜺之貝文以飾勒之當面者也蓋所以禦雨無幄乃施之有幄則無蓋漢法輶車無蓋有輻曰輪無輻曰輶輶則人鞞行之

陳氏禮書曰五路言翟言車而不言路二翟言翟

而不言車者不言路避王也不言車車不足以名之也孤言夏篆卿言夏縵至墨車以下然後言車

是亦飾盛者以飾名飾殺者以車名也重翟錫面
厭翟勒面安車彫面翟車貝面鄭司農曰錫馬面
錫鄭康成曰勒面如玉龍勒之韋為當面飾然則
錫面者錫飾馬面也勒面彫面貝面蓋亦若此勒
面以韋則錫面彫面貝面以韋可知也錫必鏤之
則彫面亦鏤錫可知也錫面彫面以金貝面以貝
則勒面有錫亦可知也或言勒或言彫互備也馬
飾莫隆於錫勒飾莫殺於貝故巾車於王之玉輅

言錫樊纓儀禮於士之喪車貝勒此重翟厭翟安車所以錫面而翟車所以貝面也

漢制皇后駕輅青羽蓋駕四馬旂九旒

東漢太皇太后皇太后皇后法駕皆御金根車重翟羽

蓋加青交輅帷裳其非法駕則乘紫罽輅車雲櫨文畫

輅黃金塗五末

五末輅一轂二箱二共五也

蓋爪施金花駕三馬左

右駢

應劭漢官儀明帝永平元年光烈皇后塋魂車駕輅青羽蓋駕四馬旂九旒前有方箱鳳凰車此因

前漢舊制

長公主乘赤罽輅車大貴人公主王妃封君油畫

輶車大貴人加節畫輶皆右駢公列侯中二千石二千石夫人會朝若親蠶各乘其夫之安車右駢加交絡帷裳皆皂非公會不得乘朝車得乘漆布輶輶銅飾五末晉制后乘重翟羽蓋金根車加青絡青帷裳雲櫨畫轅黃金塗五末蓋爪施金華駕三馬左右駢其廟見小駕則乘紫罽輶車飾及駕馬如重翟非法駕則皇太后乘輿皇后畫車后親蠶乘油畫雲母安車駕六駢馬

駢淺黑色

油畫兩轅安車駕五駢馬為副又金博山駢紫絡罽車

皆駕三驄馬三夫人油駢車駕兩馬左駢其貴人加節
畫輶三夫人助蠶乘青交絡安車駕三皆以紫絳罽輶
車九嬪世婦乘輶車駕三長公主赤罽駢車駕兩馬公
主王太妃皆油輶車駕兩馬右駢公主油畫安車駕三
青交絡以紫絳罽輶車駕三馬為副王太妃三夫人亦
如之公主助蠶乘油畫安車駕三公主有先置者乘青
交絡安車駕三諸王妃公太夫人縣鄉君諸郡公侯特
進夫人助蠶乘皂交絡車駕三諸郡公侯監國嗣子之

世婦侍中常侍尚書中書監令卿校世婦命婦助蠶乘
皂交絡安車儷駕郡縣公侯中二千石二千石夫人會
朝及蠶各乘其夫之安車皆左騂皂交絡皂帷裳自非
公會則不得乘輅車王妃特進夫人封郡君安車駕三
皂交絡封縣鄉君油輅車駕兩馬右騂

宋因晉制法駕乘重翟親蠶乘油畫雲母安車

元嘉中
東宮儀

注云中宮僕御
重翟金根車

公主安車以紫絳罽輅車為副駕三九

嬪世婦駢車駕一王妃特進夫人封君皂交絡安車駕

三其貴人公主王妃封君油輶車駕二右駢公列侯中
二千石夫人會朝及蠶所乘依漢故事

齊因重翟車加金塗校具白地人馬錦帖箱隱漆後戶
白牙的帖金塗面釘漆畫鐵鉗金塗縱容後路鏤師子
鐔輓皆施金塗螭首及龍雀等諸飾輓衡上施金博山
又有金塗長角巴首蓋飾金塗爪支子花二十八青油
挾碧絹黃紋蓋漆布箱紫顏黃紋紫紋隨陰碧氎
徒昆反
外上施絳紫絲絡碧旂九旒榮戟皇太子妃厭翟車如

重翟飾而微減油絡畫安車公主王妃三公特進夫人
所乘其貴人公主三夫人九嬪世婦三公妃特進夫人
所乘正副皆依漢晉

梁天監二年令上臺六宮長公主公主諸王太妃皆得
乘青油榻幢通幃車榻幢涅幃為副綵女皇女諸王嗣
子侯夫人皆乘赤油榻幢車以涅幃為副侍女聽涅幃
二乘

後魏熙平中有司蘇紹議皇后之輅其從祭則御金根

車親喪則御雲母車歸寧則御紫罽車遊行御安車弔問御紺罽車并駕四馬

北齊因魏制其諸公主乘油朱絡網車車中飾用金塗及純銀

後周皇后之車十二等一曰重翟以從皇帝祀郊禘享先皇朝皇太后二曰厭翟以祭陰社三曰翟輅以採桑四曰翠輅以從皇帝見賓客五曰雕輅以歸寧六曰篆輅以臨諸道法門六輅皆錫面朱總金鈎七曰蒼輅以

適命婦八曰青輅九曰朱輅十曰黃輅十一曰白輅十二曰元輅五時常出則供之六輅皆䟽面績總諸公夫人之輅車九厭翟翟輅翠輅皆錫面朱總金鈎雕輅篆輅皆勒面

刻白黑韋為當顯

績總朱輅黃輅白輅元輅皆雕面

鷺總

總黑色繒其著如朱總

諸侯夫人自翟輅而下八諸伯夫人

自翟輅而下七諸子夫人自雕輅而下六諸男夫人自篆輅而下五鞶纓就數各視其君三妃三公夫人之輅九篆輅朱輅黃輅白輅元輅皆勒面縹總夏篆夏縹墨

車棧車皆雕面鷺總三代

由內反

三孤內子自朱輅以下

八六嬪六卿內子自黃輅而下七上下媛婦中大夫孺人自夏篆而下四女御婉士婦人自夏縵而下三其顰纓就各以其等皆簞第漆之君以赤卿大夫士以元君駕四三輈六轡卿大夫士駕二一輈四轡

隋開皇初李德林奏用後魏熙平蘇紹議皇后之輅後著令制重翟青質金飾諸末朱輪金根朱牙其箱飾以重翟羽青油幢朱裏通幃繡紫帷朱絲絡網繡紫絡帶

八鸞在衡鏤錫鞶纓十二就金鏤方釳插翟尾朱總駕
蒼龍受冊從祀郊禘享廟則供之厭翟赤質金飾諸末
輪畫朱牙其箱飾以翟羽紫油幢朱裏通幃紅錦帷朱
絲絡網紅錦帶餘如重翟駕赤騶親桑供之翟車黃質
金飾諸末朱輪畫朱牙其側飾以翟羽黃油幢黃裏通
幃白紅錦帷朱絲絡網白紅錦絡帶餘如重翟駕黃騶
歸寧則供之諸鞶纓之色皆從車質安車赤質金飾紫
通幃朱裏駕四馬臨幸及弔則供之輦金飾同於蓬輦

通幃班輪駕四馬宮苑近行則乘之屬車三十六乘皇太子妃乘翟車以赤為質駕三馬畫轅金飾犢車為幅紫幃朱網絡良娣以下並乘犢車青幃朱裏三公夫人公主王妃並犢車紫幃朱網絡五品以上並乘青幃與其夫同

唐因隋制重翟厭翟翟車安車其飾不易又制四望車紫油朱質通幃畫絡帶拜陵臨弔則供之又制金根車朱質紫油通幃畫油絡帶朱絲絡網常行則供之內命

婦夫人乘厭翟車嬪乘翟車婕妤以下乘安車各駕二馬外命婦公主王妃乘厭翟車駕二馬自餘一品乘白銅飾犢車青通幃朱裏油幢朱絲絡網駕牛二品以下去油幢絡網四品青偏幔其王公以下車輅皆太僕官造貯掌之若受制行冊命及二時巡陵婚葬則給之

皇太后皇后鹵簿清游旗

一人執二人引二人夾領三十人並帶橫刀執稍弩弓箭

而次虞候飲飛二十八人

夾道單行

次內僕令

一人

內僕丞

一人次黃麾一人執次左右廂黃麾伏

廂各三行

左右

領軍衛

各領五色繡幡六口

次內謁者監四人給事二人內常侍

二人內侍一人

並騎分左右

次內給使

百二十人分左右

屬子單畫

宮人車次偏扇團扇方扇

各二十四分左右宮人執

次香鐙一

內給使四

人昇次重翟車

青質金飾駕四馬受冊從祀享廟則乘之駕士二十四人

次行障六具

分左右次坐障三具

分左右次內寺伯二人

領寺人六人騎分左

右夾重翟車

次腰輿一執者八人次團扇二次大繖四次孔

雀扇八

分左右

次錦花蓋二次小扇朱畫團扇

各十二次並橫行

錦曲蓋二十次錦六柱八扇

分左右自腰輿已下並大內給使執

次宮人

車次後黃麾一次供奉宮人

在黃麾之後

次厭翟車

朱質金飾駕赤

駟四親蠶採桑則乘之

次翟車

黃質金飾駕赤驂駟四寧于家乘之

次安車

赤質金飾駕赤

駟四臨幸及弔則乘之駕士各二十四人

次四望車

朱質駕牛拜陵臨弔則乘之

次金根

車

朱質駕牛常行則乘之駕士各十二

次左右廂各牙門二

門二人執次

左右領軍衛

廂各百五十人執次

父盡鹵簿曲折陪後門並

在父杖行之內

前後部鼓吹金鉦柶鼓大鼓小鼓長鳴中鳴鐃

次羽葆鼓吹橫吹節鼓御馬並減大駕之半

皇太子妃鹵簿清道率府校尉六人

騎分左右為三重引帶弓箭橫刀

次青衣十人

分左

次導客舍人四人

分左右

次內給使

六人

朱衣分左右
後盡內人車

次偏扇團扇方扇各十八

各分左右
宮人執並

問綵

次行障四具

分左右夾
車宮人執

次坐障二具

夾車宮人執

次內

典二人

騎分
左右

次翟車

駕三馬
士十四人

次閣師二人

領內給使
十八人分

次六柱二扇

內給
使執

次供奉內人

乘犢
車

次繖一

正道
行

扇二團扇四曲蓋二

分左右各
內給事執

次戟九十

分左右在內
給使單行前

與青衣齊後
盡內人車

內命婦四妃九嬪婕妤美人才人鹵簿

太子良娣
以下同

清道

二人青衣六人

青衣九嬪四人餘並二人

偏扇團扇方扇各十六

九嬪

十四餘

行障三具

九嬪以下二具

坐障二具

九嬪已下一具並婦人執

厭翟

車

九嬪翟車嬖好以下安車並駕二馬馭十人九嬪以下八人

內給使十六人

九嬪四餘並

十從車六乘

九嬪四餘三乘

繖一大扇二

九嬪已下無大扇

團扇二

內給使執

戟六十

九嬪四十餘並二十

外命婦鹵簿一品清道二人青衣六人

二品青衣四人三品四品二人

偏扇團扇方扇各十六

二品十四三品四品八

行障三具

二品三品三具

四品坐障二具

已下並一具

厭翟車

從人十六夾車駕一馬馭人八非公王妃並

乘白銅飾犢車駕牛馭人四從車六乘二品三品四乘四品二乘二品從人十四已下各減二

一大扇一

二品已下無大扇

團扇二戟六十

二品四十三品二十四品無戟

宋朝皇后鹵簿唯用厭翟車其制箱上有平盤四角曲欄兩壁紉窗龜文金鳳翅前有虛櫃香爐香寶緋繡幃衣絡帶門簾三轅鳳首畫梯推竿行馬緋繒裹索駕六馬金銅面纓轡鈴襍緋襍駕士三十人武弁緋繡衫常出止用正副金塗銀裝白藤輿各一上覆梭櫚屋飾以鳳輦官同乘輿平頭輦之制

內外命婦之車銀裝白藤輿檐內命婦皇親所乘白藤輿檐金桐犢車漆犢車或覆以氈或覆以椶內外命婦通乘

皇太后皇后鹵簿皆如禮令昭憲孝明孝章元德明德莊穆皇后園陵嘗用之公主鹵簿惟葬日給之秦國成聖繼明夫人葬日亦給外命婦一品鹵簿自餘未嘗用之

仁宗初章獻太后臨朝儀衛始盛乾興元年用禮儀院

奏製皇太后所乘輿名之曰大安輦具皇太后出入鳴鞭儀衛凡御龍直總五十四人骨朶直總八十四人弓箭直弩直合五十四人殿前指揮使左右班合五十六人禁衛皇城司二百人寬衣天武二百人儀衛供御輦宮六十二人寬衣天武百人其侍衛諸司應舉悉如乘輿

神宗嗣位尊皇太后為太皇太后而皇太后皇后常出

止用副金塗銀裝白藤輿

制見前

乃詔太皇太后出入所

乘如萬安太后輿上設行龍六制飾率有加

哲宗紹聖元年議造皇太后太安輦中書具治平元豐皇太后輿服儀衛以呈曰元豐中宣仁謙恭不乘太安輦上曰今皇太后獨尊非宣仁比遂詔行幸進太安輦而皇太后嫌避竟不製造

哲宗即位尊朱貴妃為皇太妃出入乘檐子有司請用牙魚鳳為飾繖用青元祐三年太皇太后詔有司尋繹典故於是檐子飾以龍鳳繖用紅九年羣臣議改檐子

爲輿上設行龍五出入由宣德東偏門帝以皇太后諭
旨令太妃坐六龍輿出入進黃繖由宣德正門於是三
省議皇太妃坐龍鳳輿繖紅黃兼用從皇太后出入止
用紅

徽宗政和三年議禮局上皇后車輿之制重翟車青質
金飾諸末間以五采輪金根朱牙其箱飾以重翟羽面
施雲鳳孔雀刺鏤龜文頂輪上施金立鳳耀葉青羅幃
衣一紫羅畫雲龍絡帶二青絲絡網二紫羅畫帷一青

羅畫雲鳳夾幔二車內設紅褥及坐橫轅上施立鳳八
香櫃設香爐香寶飾以螭首前後施簾長轅三飾以鳳
頭青繒裹索駕青馬六馬有銅面插翟羽輦纓襟胸鈴
拂青縹青色尾若受冊謁景靈宮則乘之厭翟車赤質
其箱飾以次翟羽紫幘衣紅絲絡網紅羅畫絡帶夾幔
錦帷餘如重翟車駕赤騮四若親蠶則乘之翟車黃質
其車側飾以翟羽黃幘衣黃絲絡網錦帷絡帶餘如重
翟車駕黃騮四安車赤質金飾間以五采刻鏤龜文紫

幃衣錦帷絡帶紅絲絡網前後施簾車內設褥及坐長
轅三飾以鳳頭駕赤騮四凡駕馬輦纓之飾並從車質
四望車朱質青幃衣餘同安車駕牛三金根車朱質紫
幃衣餘同安車駕牛三自重翟以下備鹵簿則皆以次
陳設藤輿金塗銀裝上覆梭欄屋以龍飾常行之儀則
用之

皇后鹵簿之制清游隊旗一

執一人引二人
夾二人並騎

金吾衛折

衝都尉一員騎

執襟稍
二人夾

領四十騎執稍二十人弩四人

欽定四庫全書

文獻通考

十四

橫刀一十六人次虞候飲飛二十八騎內僕內僕丞各

一員

各書令史二人並騎

次正道黃麾

執一人夾二人並騎

次左右廂黃麾

仗廂各三行行一百人第一行短戟五色氅第二行戈

五色氅第三行儀鎗五色幡左右領軍衛左右威衛左

右武衛左右驍衛左右衛等各三行行二十人各帥兵

官六人領內左右領軍衛帥兵官各三人各果毅都尉

一員檢校

各一人並從

左右領軍衛絳引旗引前掩後各六

次內謁者監四人給事內常侍內侍各二人並騎

內給使各

一人次內給使一百二十人次偏扇團扇方扇各二十

步從四次香鑒一執擎內給使四人

在重翟車前

次重翟車駕青

馬六駕士二十四人行障六坐障三夾車並宮人執次

內寺伯二人騎領寺人六人分左右夾重翟車次腰輿

一輿士八人團雉尾扇二夾輿次大繖四大雉尾扇八錦花

蓋二小雉尾扇朱畫團扇各一十二錦曲蓋二十錦六

柱八扇

自腰輿以下並內給使執

次宮人車次絳麾二

各一

次正道

後黃麾一

執一人夾二人並騎

次供奉宮人次厭翟車駕赤騮翟

車駕黃騮安車駕赤騮各四駕士各二十四人四望車金根車各駕牛三駕士各一十二人次左右廂各置牙

門二

每門執二人夾四人一在前黃麾前一在後黃麾後

次左右領軍衛每廂各

一百五十人執父帥兵官四人檢校次左右領軍衛折衝都尉各一員檢校父仗各一人騎從次後父仗內正道置

牙門一每門監門校尉二人騎每廂各巡檢校尉一員騎往來檢校前後部鼓吹金鈺柶鼓大鼓長鳴中鳴鐃吹羽葆鼓吹節鼓御馬並減大駕之半

皇太子妃鹵簿之制清道率府校尉六人騎青衣十人

次導客舍人四人內給使六十人偏扇團扇方扇各一

十八

並宮人執

行障四坐障二夾輦

宮人執

典內二人騎厭翟

車駕三馬駕士一十四人次閤師二人領內給使十八

人夾車六柱二扇

內給使執

次供奉內人

乘犢車

次繖一

正道雉

尾扇二團扇四曲蓋二

執繖扇各內給使一人

次戟九十

命婦鹵簿附見品官鹵簿門

孝宗隆興二年禮官言五禮新儀皇后受冊畢乘重翟

車陳小駕鹵簿朝謁景靈宮次詣德壽宮朝謁今重翟車等未備請止用肩輿龍檐子從之

乾道元年詔有司製皇太子妃檐子如政和六年之制竿梁黑漆角獸白藤織花面茜紅羅掌扇四柄檐子前以小殿侍二人抱鍍金青香毬

寧宗慶元二年冊皇妃製檐子金鍍銀裝釘椽頂紅黃藤百花龍總以香檀木為之椅子以金雕龍首褥以紅羅裝釘以金鍍銀葉條以紅葦屏風夾幔皆以紅羅供

御輦官三十六人次供御十四人下都五十四人

皇太子皇子公卿以下車輦鹵簿

周禮巾車金輅鈎樊纓九就建大旂以封同姓象路朱

樊纓七就以封異姓革路龍勒條纓五就以封四衛木

路前樊鵠纓建大麾以封蕃國

同姓謂子母弟以功德出封若魯衛之屬異姓

王甥舅四衛四方諸侯守衛者蠻服以內也蕃國謂九州之外夷鎮蕃服其制度並注見乘輿門

服車

五乘

服車服事者之車也

孤乘夏篆

謂五色畫轂約也

卿乘夏慢

夏縵亦五采畫

無篆大夫乘墨車

墨車不畫但以漆革車而已

士乘棧車

不革鞅而漆也

庶人

乘役車

箱方可載任器以供役

漢皇太子皆安車朱班輪飛輦青蓋金虎爪倚花較伏鹿櫺文畫輻吉陽簫文輶金塗五末旂九旂降龍皇太子為王賜以乘之皇孫綠車以從皆左右駢三馬

名皇孫車

景帝中元五年始詔六百石以上施車輻得銅五末輶有吉陽簫二千石以上右駢三百石以上帛布蓋千石以上皂繒蓋二百石以上白布蓋皆四維扛衣賈人不得乘馬車吏赤蓋扛其餘皆青

古今注曰武帝天漢四年令諸侯王大國朱輪

特虎居前左兕右鹿小國
特熊居前麋鹿居左右

大使車立乘駕四赤帷裳持

節者重道從賊曹車斧車功曹車皆兩大車伍百璫弩
十二人辟車四人從車四乘小使車不立乘有駢赤屏
泥油重絳帷導無斧車近小使車蘭輿赤轂白蓋赤帷
騶騎四十人此追捕考按有所執取者所乘諸侯車皆
朱斑輪四幅赤衡軛公卿二千石郊廟明堂祀陵法出
皆大車立乘駕駟他出乘安車其飾如金根車如施組
連璧交結四角金龍銜璧垂五綵析羽旒蘇前後雲氣

畫帷裳摭文畫轡長與車等駕布施馬

布施馬者純白駱馬也以黑藥

灼其身為武文

公卿以下至縣三百石五吏賊曹督賊功曹皆

帶劍三車導從縣令以上加導斧車牛車武帝推恩之末諸侯有寡弱者皆乘牛車其後牛車稍通貴者之所乘

諸馬之文王公列侯鏤錫义髦朱鑣朱鹿朱文絳扇汗青瑕燕尾卿以下有駢者緹扇汗青瑕尾當盧义髦上下皆通中二千石以上及使者乃有駢駕云

程氏演繁露曰漢初馬少故曰自天子不能具醇
駟將相或乘牛車言惟天子之車然後有馬然亦
不能純具一色至將相則時或駕牛也自吳楚誅
後諸侯惟是食租衣稅無有橫入故貧者或乘牛
車則此之以牛而駕自緣貧窶無資可具非有禁
約也漢韋元成以列侯侍祠天雨淖不駕駟馬車
而騎至廟下有司劾奏削爵則舍車而騎漢已有
禁矣東晉惟許乘車其或騎者御史彈則漢法仍

在也至其駕車遂改用牛王導駕短轅犢車犢牛
犢也王濟之八百里駁駁亦牛也言其色駁而行
速日可八百里也石崇之牛疾奔人不能追此其
所以寶之也南史吳興太守之官皆殺輓下牛以
祭項羽知駕車用牛也豈通晉之制皆不得駕馬
也邪子於是考按上古駕車則皆駕牛無用馬者
故易曰服牛乘馬也又曰皖彼牽牛不以服箱則
牛服之謂也至古之耕却不用牛孔子弟子中有

冉耕字伯牛豈前此未以牛耕邪詩十千為耦長
沮桀溺耦而耕沮溺二人相對自挽犁也甘誓御
非其馬之正汝不供命詩曰四牡騤騤蕭蕭馬鳴
有車鄰鄰有馬白顛則車皆馬駕也然則此時牛
既不耕又不駕車則將何用也至於馬既駕車車
重而鈍又未有人知用馬為騎直至六韜方著騎
兵詩書中元未之有此制殆難考也

後漢制公卿乘安車朱斑輪飛軫倚鹿較伏熊軾皂繒

蓋黑輜右駢旂九旂鏤錫义旄朱鑣縱末鹿文絳扇汗
青翅燕尾卿以下有駢者緹扇汗中二千石皆皂蓋朱
兩輜千石六百朱左輜

輜長六尺下屈廣八寸上業廣
尺二寸九丈十二物後謙一寸

若月初生然
不敢自滿也

後漢百官導從卒公卿以下至縣三百石長導從置門
下五吏賊曹督察盜賊功曹皆帶劍三車導主簿主記
兩車為從縣令以上加導斧車公乘安車則前後并馬
立乘長安雒陽令及王國都縣加前後兵車亭長設右

駢駕兩璫弩車前伍伯公八人中二千石二千石六百石皆四人自四百石以下至二百石皆二人黃綬武官伍百文官辟車軫下侍閣門闌部曲街里走卒皆有程品多少隨所典領驛馬三十里一置卒皆赤幘絳帟云古者軍出師旅皆從秦省其卒取其師旅之名焉公卿下至二千石騎吏四人千石以下至三百石縣長二人皆帶劍持檠戟為前列捷弓韞九韞諸侯王法駕官屬傳相以下皆備鹵簿似京都官騎張弓帶韞遮迺出入

稱課促列候家丞度子導從若會耕祠主縣假給辟車
鮮明卒備其威儀導從事畢皆罷所假

程氏演繁露曰太守五馬莫知的據古樂府五馬
立踟躕即其來已久或言詩有良馬五之侯國事
也然上言良馬四之下言良馬六之則或四或六
元非定制也漢有駟馬車正用四馬而鄭元注詩
曰周禮州長建旂漢太守比州長法御五馬元以
州長比方漢州大小相絕遠矣周之州乃反統隸

於縣比漢太守品秩殊不侔不足為據然鄭後漢
時人則太守之用五馬後漢已然矣至唐白樂天
和深春二十詩曰五匹鳴珂馬雙輪畫戟車至其
自杭分司有詩曰錢唐五馬留三匹還擬騎來攬
擾春老杜亦曰使君五馬一馬驄則是真有五馬
矣若其制之所始則未有知者

魏因漢制文帝問東平王有輅為是特賜乎鄭稱對曰
天子五輅金輅以封同姓諸侯得與天子同乘金輅非

特賜始有也

晉皇太子安車因魏制而駕三馬非法駕則乘畫輪車上開四望綠油幢朱絲繩絡兩廂裏飾黃金漆塗五末其副車三乘形制如所乘但不畫輪耳王青蓋車皇孫綠蓋車並駕三左右駢

晉制雲母車以雲母飾犢車以賜王公皂輪車駕牛形如犢車皂漆較轂上加青油幢朱絲繩絡諸王三公有勲德者特加之位至公或四望三望夾望車油幢車駕

牛如犢車皂輪但不漆轂王公大臣有勲德特給之通
幃車駕牛如犢車但舉其幃通覆車上諸王三公並乘
之武帝詔給魏舒陽燧四望小車三望如四望油幢給
車似三望而減王公加禮者乘次三望平乘車

竹簾子
壁指輪

為輪

通幃

其後形龍牽金塗支子花細轅
頭後稍杳伏神承塗庶人亦然

三公諸王所乘

自四望至平乘皆銅校飾諸公給朝車駕駟安車黑耳
駕三自祭酒掾下及令史皆皂輅特進以下諸將軍非
持節都督者給安車黑耳駕二三公九卿二千石皆人

車立乘駕四去位致仕告老賜安車駕四郡縣公侯安
車駕二右駢皆朱斑輪倚鹿車伏熊軾皂繒旂旂公八
侯七卿五皆畫降龍中二千石二千石皆皂蓋朱輪同
五駕二千石六百石朱左輪王公之元子攝命理國者
安車駕三旂七旂封侯之元子五旂大使車立乘駕四
赤帷裳騶騎公卿二千石郊廟上陵從駕所乘小使車
不立乘駕四輕車之流也蘭輿皆朱轂赤屏泥白蓋赤
帷裳追捕執取者所乘凡諸使車皆朱斑輪赤衡軛追

鋒車去小蓋加通幔如輅車駕二以迅速為名戎陣之間是為傳乘輅車古將軍所乘傳之車

按漢貴輅輅而賤輅車魏晉貴

輅車而賤輅輅三品將軍以上尚書令輅車黑耳有後戶僕射但有後戶耳並皂輪也

東晉安帝時皇子乘後山安車制如金輅

宋因之皇子為王亦錫以皇太子之安車皇孫綠車亦因舊法其追鋒車雲母車四望車公及列侯所乘安車依漢舊制駕二馬旂旗旂王公侯七鄉五皆降龍公卿中二千石郊陵法出皆大車立乘駕四他出去位致仕

者皆安車四馬二千石皆皂蓋朱轡銅五末駕二右駢
王公之世子攝命治國者安車駕三旂旗七旂侯世子
五旂

齊皇太子乘象輅校飾如御旂旗九旂降龍制黃屋車
建碧旂九旂

九旂鸞輅也蓋以黃絡為裏金塗校其絳絲

九命上公所乘青

蓋安車朱轡斑輪駕一左右駢通轆車為副諸王禮行
所乘皂蓋安車朱轡漆斑輪駕一通轆朱車為副三公
禮行所乘安車黑耳皂蓋朱轡駕一牛車為副國公列

侯禮行所乘馬車駕一九卿領護二衛驍游四軍五校從郊陵所乘餘同晉法

梁皇太子皇子因齊象輅制鸞輅駕三左右駢朱斑輪倚獸較伏鹿軾九旂降龍青蓋畫幡文輶金塗五末以畫輪車為副常乘畫輪則衣畫車為副其畫輪車上開四望綠油幢朱繩絡兩箱裏飾以金錦二千石四品以上及列侯皆給輅車駕牛伏兔箱青油幢朱絲絡網轂皆黑漆天監二年令三公開府尚書令給鹿輅輅施耳

後戶皂輜尚書僕射左右光祿大夫侍中中書監祕書
監給鳳輶輶後戶皂輜領護國子祭酒太子詹事尚書
侍中列卿等給聊泥輶無後戶漆輪車驃騎及諸王除
刺史帶將軍給龍雀輶以金銀飾御史中丞給方蓋輶
形小如繖諸王三公有勲德者皆特加皂輪車駕牛形
如犢車但烏漆輪轂黃金雕裝上加清油幢朱絲絡通
幟王公加禮者給油幢絡車駕牛朱輪華轂

程氏演繁露曰舊尚書令僕中丞駟唱得入宮門

止於馬道

馬道是許人上馬處也

郭祚為僕射奏言非盡敬

之宜騶唱不入宮自此始也按騶唱者騶從之傳呼也朱仲遠為行臺僕射請準朝式在軍鳴騶廢帝笑而許之史臣謂其任情則是僕射在朝得用騶唱而蒞軍則否軍國異容之義也在軍而乞從朝儀所以名為任情也梁制尚書令僕御史中丞各給威儀十人其七人武冠絳鞬唱呼入殿引隍至階一人執儀囊不隍

音橫

類篇曰喧也則七人同

聲唱導故曰喧也

通典二
十二

絳韞六人所謂騶也

陳因梁制

後魏太子乘金輅朱蓋赤質駕四馬三公及王車朱屋
青蓋制同五輅名曰高車駕三馬庶姓王侯及尚書令
僕以下列卿以上並給輅車駕一馬或乘四望通幃車
駕一牛

北齊因魏制庶姓王儀同三司以下翟尾扇繖皇宗及
三品以上官青繖朱裏其青繖碧裏達於士人不禁正

從一品執事散官及儀同三司乘油朱絡網車車牛飾
得用金塗及純銀二品三品乘卷通幃車車牛金飾七
品以上乘偏幃車車牛飾以銅

後周諸公之輅九方輅

各象方之色

碧輅金輅皆錫鞶纓九

就金鈎象輅犀輅貝輅革輅篆輅木輅皆疏鞶纓九就
皆以朱白蒼三綵諸侯自方輅而下八無碧輅諸伯自
方輅而下七無金輅諸子自方輅而下六無象輅諸男
自方輅而下五又無犀輅凡就各如其命三公之車輅

九祀輅犀輅貝輅篆輅木輅夏篆夏幔墨車棧車自篆
以上金塗諸末錫輦纓金鈎木輅以下銅飾諸末疏輦
纓皆九就三孤自祀輅而下八無犀輅六卿自祀輅而
下七又無貝輅上大夫自祀輅而下六又無篆輅中大
夫自祀輅而下五又無木輅下大夫自祀輅而下四又
無夏篆士車三祀車墨車棧車凡就各如其命數自孤
以下就以朱綠二采

隋皇太子金輅赤質金飾諸末重較箱畫樞文鳥獸黃

伏鹿軾龍輶金鳳一在軾前設障塵朱蓋黃裏畫輪朱
牙左建旂九旒右載闌戟旂首金龍頭銜結綴及鈴綏
駕赤騶駟八鸞在衡二鈴在軾金鑊方釳插翟尾五焦
鏤錫鞶纓九就從祀享廟正冬大朝納妃則乘之輶車
金飾諸末紫通幃朱裏駕一馬五日常朝及朝饗宮官
出入行道乘之四望車金飾諸末紫油幢通幃朱裏朱
絲絡網駕一馬弔臨則乘之

隋制公及一品象輅黃質象飾諸末建旗畫以烏隼受

冊告廟升壇上任親迎及葬則乘之侯伯及二品三品革輅白質建旗畫熊虎受冊告廟親迎及葬則乘之子男及四品木輅漆飾建旒畫龜蛇受冊告廟親迎及葬則乘之象輅以下游及就數各依爵品犢車則魏武賜楊彪七香車也駕牛自王公以下至五品以上並給乘之三品以上青幃朱裏五品以上紺幃碧裏皆白銅裝唯有參謁及弔喪者則不張幃而乘鉄裝車六品以下不給任自乘犢車弗許施幃而乘初五品以上乘偏幃

車其後嫌其美停不行用以白幟代之三品以上通幟
車則青壁一品輅車油幟朱網唯車輅一等聽始得乘
之

唐太子車輅因隋制王公以下車輅親王及武職一品

象輅自餘及二品三品革輅四品木輅五品輅車象輅

朱斑輪八在衡左建旂旂畫龍一
升一降右載闌戟革輅以草

飾左建旌通帛
為旌餘同象輅木輅以漆飾之餘同革輅輅

車曲壁青通幟諸輅質蓋旂旌皆朱一品九旂二品八

旂三品七旂四品六旂其有鞶纓就數皆準此三品以上珂九子四品七子五品五子六品以下去通幟及珂王公車輅藏於太僕受制行冊命巡陵婚葬則給之餘皆以騎代車

皇太子鹵簿家令次率更令

並乘輅車

次太保次太傅次太

師自家令已下並正道威儀鹵簿各次六十三品各乘輅

次清游隊旗

一人執一人引二人

夾領三十騎

次左右清道率府率各一人次外清道直簿二

十四人

騎分左右夾道單行

次龍旗六各一人騎執

每一騎前二人騎為二重

引前每旗後亦二人重騎護後次細引六重重二人並次率更丞一人

柁鼓金鉦各二面左鼓右鉦次大鼓三十六面正騎橫行次長

鳴三十六具正騎橫行次鐃吹一部騎鐃鼓二而各一簫笳

各六橫騎並行次柁鼓金鉦各二面一騎執左鼓右鉦次小鼓三

十六面次中鳴三十六具並騎橫行次誕馬十匹分左右

次廐牧令一人左在丞二人右在次左右翊府郎將各一人

騎領班劍次左右衛翊衛二十四人騎執班劍次通事舍人四人

騎分次直司二人騎分次文學四人騎分次洗馬二人

騎分
左右

次司議郎二人

騎分
左右

次太子舍人二人

騎分
左右

次中

允二人

騎分
左右

次中書舍人二人

騎分
左右

次左右諭德二人

騎分
左右

次左右庶子四人

騎分
左右

次左右副率各一人親勲

翊衛廂各中郎將一人並領儀刀六行

第一行親衛二
十三人第二行

親衛二十五人第三行勲衛二十七人第四行勲衛二
十九人第五行翊衛三十一人第六行翊衛三十人皆

曲折騎
陪後行

次三衛十八人

騎分
左右

郎將二人

騎分
左右在六
儀刀仗內夾輅

次金輅

赤質金飾駕四馬從祀享
正冬大朝納妃則供之

僕一人馭左右率一

人執儀刀陪乘駕士二十二人次左右衛率各一人夾

輅次左右率各一人副率各一人騎領細刀次千牛騎

執細刀弓箭次左右監門府直長各六人監後門次左

右衛率府廂各翊衛二隊並騎在執儀刀行外前後過三衛仗獸角隊各三十六

騎分執旗弓箭稍弩各郎將一人次繖二扇四次腰輦一團扇二小方

扇八次內直郎二人檢校腰輿次誕馬十匹分左右次典乘

二人分左右次朱漆團扇六紫曲蓋六次諸司供奉官

人次大角三十六具橫行六重次鐃吹一部鼓二面簫笳各六並騎橫行

次橫吹一部橫吹十具節鼓一面笛簫箏箏各五並騎橫行次令官師二人

次副輅駕四馬

駕士二十人

次輅車

金飾駕一馬五日常朝及朝饗官臣出入行道

則乘之駕士十四人

次四望車

金飾駕一馬臨弔則乘之駕士十人

次左右廂步隊

十六隊

隊列三十人果毅一人皆執弓箭刀稍弩相問

次左右司禦率各一人

檢校步隊

次儀仗左右廂各六色

色九行行六人皆執戟弓箭鋌刀盾儀鎧五色幢油

戰相間

廂各獨揭鼓六重

重二人皆儀仗外

次左右廂各百五十

人執爨

並分前後在步隊儀仗外馬隊內前接六旗後盡鹵簿廂各果毅一人主七師七人騎領分前

後次左右廂馬隊廂各十隊

隊引主帥以下三十一人並戎服帶領刀弓箭弩稍

隊引旗一果毅一人領之

次後拒隊旗一領三十騎果毅一人領前

當正道受仗內開牙門次左右廂各開牙門三

前第一門左右

司禦率隊後左右率府步隊前開第二門左右衛率府步隊後司禦率府儀仗前開第三門左右司禦率府儀仗後左右率府步隊前每門皆二人步四人夾左右監門副率各一人直長二人騎來去檢校也

次左

右清道率府副率二人

仗內檢校并糾察非違率應得驟稍從者並不得將入儀仗內

次少師次少傅次少保

隊仗引盡則次三少正道乘輅威儀各依本品文武官以次陪

從

若常行及常朝去諸馬隊鼓吹金輅四望車家令率

更詹事太保太師少保少師其隊仗三分減一清道儀

刀誕馬各減半乘輅車餘同大仗其二傳皆乘犢車依

式道從不得過十人太傅加清道二人導引其鹵簿內道從官三師三少若有事故及無其人則闕總不須攝餘若有事故及無其人則別遣人攝行若皇太子在學太傅少傅導從如式

親王鹵簿清道六人為三重次幟弩一次青衣十二人

分左

次車輻十二人

分右

次戟九十

分右

次絳引幡六

次內給使左右廂各三行

行四十人各執刀楯弓箭及鎗並戎服

次柶鼓

金鉦各一面

一騎執二夾騎

次大鼓十八面

騎橫行正道

次長鳴

十八具

騎橫行
正道

次小鼓十面中鳴十具

分左右單行中
鳴在小鼓外

節一夾稍二次告止幡四次傳教幢四次信幡八次儀

鉦二次儀鎗六次油戟十八次儀稍十次細稍十次儀

刀十八次誕馬八次府佐六人

騎分
左右

次象輅一

駕四馬
駕士十

八次繖扇一次采漆團扇四曲蓋二次麾幢各一次大

角八騎

二重橫
行正道

次鐃吹一部

鐃鼓一面簫筚
各四騎橫行

次橫吹一

部

橫吹六騎節鼓一騎二人夾騎
笛簫篳篥各四騎橫行正道

羣官鹵簿一品清道四人

為三重四品
已上並二人

幟弩一騎青衣

十人車輻十人

三品八人自下遞減二人

戟九十人

二品七十三品六十四品五十

絳引幡六

二品以下闕之

刀楯弓箭稍各八十

二品六十三品五十四品四十

柶鼓金鈺各一大鼓十六

二品十四品三十四品八

長鳴十六

二品以下

之闕節一夾稍二告止幡二傳教幡二信幡六

其信幡二品三品四

品二餘同

誕馬六

二品三品四品四品二匹

儀刀十六

二品十四品四品二其一品

府佐四人夾行

革輅一

四品木輅並駕四馬駕士十六人自下品則減二人

繖一朱漆團

扇四

三品四品各三曲蓋二

二品以下

僚佐本服陪從麾幡各大

角八

四角自二品至四品各減二

鐃吹一部鐃簫笳各四

二品三品四品各一

橫吹一部橫吹六

二品三品四品二

節鼓一

二品以下並賜

笛簫篳篥

茄各四

二品下二

右應給鹵簿者職事四品已上散官二

品以上爵郡王已上及二王後依品級國公准三品給

官爵兩應給者從高給若京官職事五品身婚葬并尚

公主娶縣主及職事官三品以上有公爵者嫡子婚並

准四品給凡自王公以下在京拜官初上正冬朝會及

婚葬則給之

婚及拜官初上正冬朝會去稍弓箭刀楯大小鼓橫吹大角長鳴中鳴

凡應

導駕及都督刺史奉辭至任上日皆依品級

奉辭去稍弓箭刀楯

吹鉦桐鼓大小鼓橫
吹大角長鳴中鳴

中宗時皇太子將釋奠國學有司具儀從臣著衣冠
乘馬左庶子劉子元議古大夫以上皆乘車以馬為
駢服魏晉後以牛駕車江左尚書郎輒輕乘馬則御
史劾治顏延年罷官乘馬出入閭里世稱放誕此則
乘馬宜從褻服之明驗今陵廟巡謁王公冊命士庶
親迎則盛服冠履乘輅車他事無車故貴賤通乘馬
此法駕所幸侍臣皆馬上朝服且冠履惟可配車故

博帶褒衣革履高冠是車中服襪而鐙跣而鞍非唯
不師於古亦自取驚流俗馬逸人顛受嗤行路太子
從之因著為定令

宋朝皇太子車輅之制真宗仁宗為皇太子謁太廟乘
金輅常朝則乘馬

羣臣車輅鞍馬之制親王一品奉使及葬並給革輅制
同乘輿之副惟改龍飾為螭六引內三品以上乘革車
赤質制如進賢車無案駕四赤馬駕士二十五人緋纓

衣絡帶旗戟綢扛繡文司徒以瑞馬京牧以隼御史大

夫以獬豸兵部尚書以虎太常卿以鳳

駕士衣亦同

縣令乘

輅車黑質西壁紗窻一轅金銅飾紫幘衣絡帶並繡雉

啣瑞草駕二馬駕士一十八人百官常朝各乘馬鞍勒

之制金塗銀裝牡丹花校具重八十兩紫羅繡寶相花

雉子方韉油畫鞍橋白銀銜鐙以賜宰相親王使相殿

前馬軍步軍都指揮使金塗銀裝太平花校具重七十

兩紫羅繡瑞草方韉油畫鞍橋陷銀銜鐙以賜樞密使

副使叅知政事節度使殿前馬軍步軍副都指揮使都

虞以上

四廂都指揮使
鞵以紫羅剌花

若出使則加紅氍牛纓金塗銀

鈹使相外加紅織成鞍複步軍都虞侯以上賜帶甲馬

者加紅皮鞵轡校具重七十兩青氍圓鞵陷銀銜鐙金

塗銀鬧裝麻葉校具重五十兩紫羅剌花方鞵油畫鞍

橋陷銀銜鐙以賜三司使文明資政翰林龍圖樞密直

學士御史中丞兩使留後觀察防禦使廂都指揮使軍

廂都指揮使初除授團練使刺史者賜亦同

曾任中書
樞密院後

為學士中丞者
鞵以繡瑞草

金塗銀三環寶相花校具重二十五兩

紫羅圓鞵烏漆鞍橋銀銜鐙以賜團練使刺史金塗銀
促結洛州花校具重二十兩紫羅圓鞵以賜諸路承受
白成重十五兩以賜諸王官寮翰林侍讀侍書金塗銀
寶相花校具重二十兩蠻雲校具重十五兩以賜諸班
押班殿前指揮使以上白成窪面校具重十二兩以賜
諸班皆藍黃絕圓鞵至太平興國七年詔升朝官許乘
銀裝條子鞍勒六品以下不得鬧裝其鞵皆不得制繡

金皮餘餘官及工商庶人並許乘烏漆素鞍不得用猊毛暖坐其藍黃條子非宮禁不得乘士庶軍校乘白皮鞍勒者悉禁之 繖人臣通用以青絹為之國初京城內獨親王得用太平興國中宰相樞密使始用之其後近臣及內命婦出入皆用大中祥符五年詔除宗室外其餘悉禁六年復許中書樞密院用京城外則庶官通用 王公以下凡大駕六引用本品鹵簿奉冊充使及詔葬皆給之親王止用一品之制而加告止幡傳教幡

信幡各二其葬日止用六引內儀仗景德二年南郊鹵簿使王欽若上言鄆王攢日所給鹵簿與南郊儀仗吉凶相參望依今別制王公車輅所有鼓吹儀仗亦請增置以備拜官朝會婚葬之用從之於是儀服悉以畫其葬日在塗以革車代輅

玉山汪氏曰按唐制皇太子妃親王文武職事官四品以上散官二品以上并長安縣令內命婦才人以上外命婦四品以上皆給鹵簿本朝皇太子

鹵簿遇升儲則草定儀注其王公以下惟大禮奉
引乘輿及身薨勅塋則給太子妃以下内外命婦
皆不復給則是本朝人臣亦有給者而比舊愈嚴
矣故中官麥允言及充媛董氏之喪詔給鹵簿而
司馬溫公皆爭之以其非常典也

神宗元豐三年詳定禮文所言鹵簿記公卿奉引第一
開封令乘輅車開封牧隼旗次太常卿鳳旗司徒瑞馬
旗御史大夫獬豸旗兵部尚書虎旗而乘革車考之非

是按周禮巾車職曰孤乘夏篆卿乘夏縵大夫乘墨車
司常職曰孤卿建旃大夫建物請公卿以下奉引先開
封令乘墨車建物次開封牧乘墨車建旂太常卿御史
大夫兵部尚書乘夏縵司徒乘夏篆並建旃所以參備
九旂之制從之

徽宗政和三年議禮局上皇太子車輅之制金飾諸末
重較箱畫莖文鳥獸黃屋伏鹿軾龍輶金鳳一在軾前
設鄣塵朱蓋黃裏輪畫朱牙左建旂九旒右載闌戟旂

首金龍頭銜結綬及鈴綏八鸞在衡二鈴在軾駕赤騮
四金駿方釳插翟尾鏤錫鞶纓九就從祀謁太廟納妃
則供之輅車金飾諸末紫油通幃紫油纁朱裏駕馬一
四望車金飾諸末青油通幃青油纁朱裏朱絲絡網駕
馬一輅車四望車以次列於鹵簿仗內

六年禮制局言古之諸侯出封於外同姓錫以金輅異
姓錫以象輅蓋出而制節則遠君而其道伸入而謹度
則近君而其勢屈故其入覲則不敢乘金輅象輅以同

於王當自降而乘墨車也若公卿采地在天子縣內者則為都鄙之長大司馬所謂師都建旌是矣今開封牧列職於朝與御史大夫同謂之卿可也其在周官則卿大夫之職是矣又無金輅象輅之錫而乃比於古之諸侯入覲而乘墨車可乎成周上公九命車旗以九為節故建常九旂侯伯七命車旗以七為節故建常七旂男五命車旗以五為節故建常五旂其卿六品其大夫四命車旗亦各祇其命之數則卿之建旌當用六旂大夫

建物當用四旂至於三旂則上士所建也其開封令宜乘墨車而建物四旂開封牧御史大夫戶兵禮部尚書皆卿也宜乘夏縵而建旌六旂從之

皇太子鹵簿之制家令率更令詹事各乘輅車太保太傅太師乘輅各正道威儀鹵簿依本品次清游隊旗執一

人引二人
夾二人

並正道清道率府折衝都尉一員領二十騎

執稍一十八人弓矢九人弩三人二人騎從折衝次左
右清道率府率各一員領清道直簿及檢校清游隊龍

旗等執纛稍各二人次外清道直簿二十四人騎次正

道龍旗各六

執一人前二人引後二人護

副竿二

執各一人騎

次正道細

仗引為六重每重二人自龍旗後均布至細仗稍與弓

箭相間並騎每廂各果毅都尉一員領次率更丞一員

次正道前部鼓吹府史二人領鼓吹並騎柶鼓金鈺各

二

執各一人夾二人以下准此

帥兵官二人次大鼓三十六橫行

長鳴

以下准此

帥兵官八人長鳴三十六帥兵官二人鑣吹一部

鑣鼓二

執各一人夾二人後部鑣節鼓准此

簫笳各六帥兵官二人柶鼓

金鉦各二帥兵官二人次小鼓三十六帥兵官四人中

鳴三十六帥兵官二人以上並騎次誕馬十

每匹二人
控餘准此

廐牧令丞各一員

各府史二
人騎從

次左右翊府郎將各一員

領班劍左右翊衛執班劍二十四人通事舍人四人司

直二人文學四人洗馬司議郎太子舍人中允中左右

諭德各二人左右庶子四人並騎

自通事舍人
後各從名

次左右

衛率府副率各一員步從親勲翊衛每廂各中郎將郎

將一員並領六行儀刀第一行親衛二十三人曲折三

人第二行親衛二十五人曲折四人第三行勲衛二十

七人曲折五人第四行勲衛二十九人曲折六人第五

行翊衛三十一人曲折七人第六行翊衛三十三人曲

折八人

曲折人並陪後門

以上三衛並騎次三衛一十八人騎

中郎將二人夾輅在六行儀刀仗內次金輅駕馬四僕

寺僕馭左率府率一員駕士二十二人夾路左右衛率

府各一員

各步從一人

次左右率府率各一員副率各一員

並騎

各步從一人

次千牛騎執細刀弓矢三衛儀刀仗後開

牙門次左右監門率府直長各六人監後門

並騎

次左右

衛率府每廂各翊衛二隊

並騎

次壓角隊各三十人執旗

二人

引二人夾二人

執稍一十五人弓矢七人弩三人每隊各

郎將一員領次正道繖二雉尾扇四夾繖次腰輿一輿

士八人團雉尾扇二小方雉尾扇八夾

執各一人

次內直郎

令史各二人騎從檢校次誕馬十典乘二人府吏二人

騎從次左右司禦率府校尉各一人

並騎從

領團扇曲蓋

次朱團扇紫曲蓋各六

執各一人

次諸司供奉官人次左右

清道率府校尉各一人

並騎

領太角三十六鐃鼓二簫笳

各六帥兵官二人橫吹十節鼓一笛簫臧栗五帥兵官

二人

並騎

次管轄指揮使二人檢校次副輅駕四馬駕士

二十人輅車駕一馬駕士一十四人四望車駕一馬駕

士十人次左右廂步隊凡六十每隊各果毅都尉一人

領

並騎

隊三十人旗一人

引三人

並帶弓矢

騎

步二十五人前

一隊執稍一隊帶弓矢以次相間

左右司

禦率府

左右

衛率府

廂各

四隊

二

在前二

次左右司率禦府副率各一員檢校步隊各二

在後

人執標稍騎從次儀仗左右廂各六色九行行六人前
第一行戟赤氅第二行弓矢第三行儀鉞井牂第四行
刀盾第五行儀鎗五色幡第六行油戟次前仗首左右
廂各六色色三行行六人左右司禦率府各一員果毅
都尉各一員帥兵官各六人領次左右廂各六色色三
行行六人左右衛率府副率各一員果毅都尉各一員
帥兵官各六人領次盡後鹵簿左右廂各六色色三行
行六人左右司禦率府副率各一員

各一人
步從

果毅都尉

各一人帥兵官各六人領各六人護後並騎每廂各絳

引幡十二

執各一人引前旗六引後旗六

揭鼓十二

揭鼓左右司禦率府四重左右衛率

府二重

次左右廂父各一百五十人

左右司禦率府各八十六人左右衛率府

各六十人

並分前後在步隊儀仗外馬隊內前接六旗後

盡鹵簿曲折至門每廂各司禦率府果毅都尉一員檢

校各一人從每廂各帥兵官七人

並騎左右司禦率府各四人左右衛率府各

二次馬隊左右廂各十隊每隊帥兵官以下三十一人

旗一執

一人執一人引二人

執稍十六人弓矢七人弩三人前第

一隊左右清道率府果毅都尉各一員領第二第三第四隊左右司禦率府果毅都尉各一員領第五第六第七隊左右衛率府果毅都尉各一員領第八第九第十隊左右司禦府果毅都尉各一員領次後拒隊旗執一人引

二人夾二人

清道率府果毅都尉一員領四十騎執稍二十

人弓矢十六人弩四人又二人騎從次後拒隊前當正道及仗行內開牙門次左右廂各門三前第一門左右司禦率府步隊後左右率府步隊前第二門左右衛率

府步隊後司禦率府儀仗前第三門左右司禦率府儀

仗後左右衛府步隊前

每開牙門旗二人夾四人並騎

監門率府直長

各二人並騎次左右監門率府副率各一員騎來往檢

校諸門各一人騎從次左右清道率府副率各三人仗

內檢校并糾察各一人騎從次少師少傅少保正道乘

輅威儀鹵簿各依本品次文武官以次陪從

王公以下鹵簿之制中道清道六人次幘弩一騎次大

晟府前部鼓吹令及職掌局長院官各一人柶鼓金鉦

各一大鼓長鳴各一十八柶鼓金鈺各一次引樂官二

人小鼓中鳴各十次麾幢各一節一夾稍二誕馬八每匹

控馬各二人革車一乘駕赤馬四駕士二十五人散扇十方

繖二朱團扇四夾方繖曲蓋二次大角八次後部鼓吹

丞一員錄事一人次鐃鼓一簫四笳四大橫吹六節鼓

一夾色二笛簫鳳篴笳各四次外仗青衣十二車輻棒

十二戟九十絳引幡六刀盾稍弓矢各八十儀刀十八

信幡八告止幡傳教幡各四儀鉞二儀鎗斧挂五色幡

六油戟十八儀稍十二細稍十二次左右衛尉寺押當
職掌一十一人騎部轄部兵部轄騎兵太僕寺部押人
員各一名教馬官一名押當職掌四人騎

一品鹵簿之制

命婦同

中道清道四人幢弩一騎大晟府

前部鼓吹令一職掌一名局長院官各一名柁鼓金鉦
各一大鼓長鳴各一十六麾幢節各一稍二誕馬六次
革車一乘駕赤馬四駕士二十五人

命婦厭翟車駕士一十三人二品三

品准此

散扇八

二品減四三品減六命婦散扇五十
行障五行於車前二品三品准此

方纈

二朱團扇曲蓋二大角八

命婦屬車六駕黃牛十八駕士五十九人行大角前二品

三品准此

次後部鼓吹丞一員錄事一名引樂官二員鑼鼓

一簫笳大橫吹角四節鼓一笛簫鳳篋笳各四仗外青衣十人車輻棒十戟刀九十刀盾稍各八十弓矢六十儀刀三十信幡八告止幡傳教幡儀鎗斧挂五色幡各四次衛尉寺排列押當職掌一十一人部轄人員太僕寺部押人員教馬官各一名押當職掌四人

命婦加二人

二品鹵簿之制

命婦同

中道清道二人憶弩一大晟府前

部鼓吹令一及職掌局長院官各一名柶鼓金鉦各一大鼓十四麾幢節各一夾稍二誕馬四次革車一乘駕赤馬四駕士二十五人散扇四方繖朱團扇曲蓋各二次大角八次後部鼓吹丞一錄事引樂官各一名鐃鼓一簫笳各二大橫吹四笛簫觱篥各二外仗青衣八人車輻捧八戟刀楯稍弓矢各六十儀刀十四信幡四告止傳教幡各二次衛尉排列押當職掌九人太僕寺部押人員教馬官各一名押當職掌四人

命婦加二人

三品鹵簿之制

命婦同

中道清道二人憶弩一麾幢各一

節一夾稍二誕馬四次革車一乘駕赤馬四駕士二十

五人散扇二方繖二曲蓋一大角四外仗青衣八人車

輻捧六戟六十刀盾稍弓矢各五十儀刀十二信幡四

告止傳教幡各二次衛排列押當職掌七人部轄人員

太僕寺部押人員教馬官各一名押當職掌四人

命婦如二

人

政和時詔賜諸王三接青羅繖一紫羅大掌扇二遂為

故事皇太子用三簷青羅繖紫花羅掌扇四

高宗建炎元年詔百官特許乘轎惟不以入皇城

舊制百官入朝並乘馬若耆德大臣及宗室屬近行尊者許乘肩輿政和三年冬以雪凜暫許百官乘轎不以入宮門路通復常制靖康末高宗至磁州守臣

宗澤以所乘轎進黑漆紫褥上却之

在京百官不用肩輿所以避至

尊建炎初元上以維揚道滑難於乘騎乃諭輔臣曰

君臣一體朕不欲使羣臣奔走危地特許乘轎惟不

以入皇城二年隆祐太后至杭州有司言州僚乘轎
張蓋不少裁抑於禮未安詔不許乘涼轎紹興七年
詔監察御史以上出入宰執以下退朝入局並乘馬
遇雨乘轎沿邊臣僚內地巡尉並令乘馬三十二年
十一月詔張燾朝謁許乘轎出入皇城門至宮門內
上下馬處隆興二年參知政事周葵為隆興二年
馬所傷暫令乘轎入內赴朝參隆興二年
詔左僕射陳康伯乘肩輿出入皇城門至殿門外優
禮也

程氏演繁露曰百官得於寓京乘轎自揚州始後
遂不復乘馬惟從駕則乘之祖宗時臣僚雖在外
亦不許乘轎也唐會要開成五年黎植奏朝官出
使自合乘驛馬不合更乘檐子自此請不限高卑
不得輒乘檐子如疾病即任所在陳牒申中書門
下及御史臺其檐夫自出錢雇其宰相至僕射致
仕官疾病者許乘之

孝宗乾道元年禮官言皇太子朝謁太廟當服袞冕乘

金輅既而太子言至道天禧故事非臣子所安乃免乘輅設伏九月詔皇太子從祀乘金輅令有司排設皇太子亦辭之

舊制車駕行幸東宮扈從在三省之上乾道中詔於駕後方圍子內行馬

乾道中詔臣僚導從至太廟景靈宮牆並禁治張蓋太常少卿林栗言車駕經太廟有司預節音樂止警蹕稍近則却繖扇至尊撫式輦士趨進實惟古禮式

趨宗廟之儀而臣下呵導張蓋未有條約於是申嚴
其禁

文獻通考卷第一百十九

欽定四庫全書

文獻通考卷一百二十

鄱陽馬端臨貴與著

王禮考十五

國恤

虞舜攝政二十有八載帝乃殂落

帝堯殂落崩也堯壽一百一十七歲

百

姓如喪考妣

百姓百官

三載四海遏密八音

遏絕密靜也四海四夷四夷絕

音三年則華夏可知言威德所化者遠也賈公彥儀禮疏曰易繫辭云古者期喪無數在黃帝九事章中是

黃帝以前心喪終身不變也虞書云百姓如喪考妣三
歲四海遏密八音則是唐虞之日心喪三年亦未有服

也制

殷太甲惟元祀十有二月乙丑伊尹祠于先王奉嗣王

祗見厥祖侯甸羣后咸在百官總己以聽冢宰

此湯崩
踰月太

甲即位奠殯而告

疏曰太甲中篇云三祀十有二月

伊尹以冕服奉嗣王則是除喪即吉明十二月服終禮

記稱三年之喪二十五月而畢知此年十一月湯崩湯

踰月太甲即位奠殯而告亦如周康王受顧命尸於

天子春秋之世九有奠殯即位踰年即位踰月即位當

奠殯即位也此言伊尹祠于先王是特設祀也嗣王祗

見厥祖是始見祖也特設祀禮而王始

見祖明是初即王位告殯為喪主也

高宗王宅憂亮陰三祀

陰默也居憂信默三年不言禮記作諒闇鄭元以為凶廬論語

作諒陰孔氏曰諒信也陰默也字義各不同

尚書大傳書曰高宗梁闇三年不言何謂梁闇也傳

曰高宗居凶廬三年不言此之謂梁闇子張曰何謂

也孔子曰古者君薨王世子聽於冢宰三年不敢服

先王之服履先王之位而聽焉以民臣之義則不可

一日無君矣不可一日無君猶不可一日無天也以

孝子之隱乎則孝子三年弗居矣

隱痛也字或為殷

故曰義

者彼也隱者此也遠彼而近此則孝子之道備矣
喪服四制書曰高宗諒闇三年不言善之也王者莫
不行此禮何以獨善之也曰高宗者武丁武丁者殷
之賢王也繼世即位而慈良於喪當此之時殷衰而
復興禮廢而復起故善之善之故載之書中而高之
故謂之高宗

周武王崩成王十三而嗣立周公居冢宰攝政明年六
月既葬周公冠成王而朝于祖以見諸侯祝雍作頌

閔予小子嗣王朝于廟也閔予小子遭家不造嬛嬛

在疚

謂遭武王崩家道未成嬛嬛然孤特在憂患之中

於乎皇考永世克孝

念茲皇祖陟降庭止

庭直也陟降上下也言武王長世能以孝行為子孫法文王以

直道事天治民

維予小子夙夜敬止於乎皇王繼序思不忘

序緒也繼其序思其所行之道不忘

成王將崩命名公畢公率諸侯相康王作顧命惟四月

哉生魄王不懌

始生魄十六日王有疾故不悅懌

甲子王乃洮頰水相

被冕服憑几

王發大命臨羣臣必齊戒沐浴今疾病危殆故但洮盥頰面扶相者被袞冕憑

王几以發命

乃同召太保奭芮伯彤伯畢公衛侯毛公師氏

虎臣百尹御事

同召六卿下至御治事者太保芮伯彤伯畢公衛侯毛公六卿也冢宰第一召

公領之司徒第二芮伯為之宗伯第三彤伯為之司馬第四畢公領之太保畢毛三公兼也芮彤畢衛毛皆國名入為天子公卿師氏大夫官虎臣虎賁氏百尹百官之長及諸御治事者平時則召六卿使帥其屬此則將發顧命自六卿至御事同以王召命也王曰嗚呼疾大漸惟幾病日臻既

彌留恐不獲誓言嗣茲予審訓命汝

此下成王顧命也自嘆其疾大進惟

危殆病日至既彌甚而留連恐遂死不得誓言以嗣續我志此我所以詳審發訓命汝統言曰疾甚言曰病

昔君文王武王宣重光莫麗陳教則肄肄不違用克達

殷集大命

武猶文謂之重光猶舜如堯謂之重華也莫定麗依也言文武宣布重明之德定民所依

陳列教條則民習服習而不違天下化之用能達於殷邦而集大命於周也

在後之侗敬迓

天威嗣守文武大訓無敢昏逾

侗愚也成王自稱言其敬迎上天威命無敢少

忽嗣守文武大訓而無敢昏逾天威天命也大訓述天命者也

今天降疾殆弗興弗悟

爾尚明時朕言用敬保元子釗弘濟于艱難

釗康王名成王言今

天降疾我身殆將必死弗興弗悟庶幾明是我言用敬保元子釗大濟於艱難曰元子者正其統也

柔遠

能邇安勸小大庶邦

懷來馴擾安寧勸導皆君道所當盡者合遠邇小大而言又以見君

德所施公平周溥而不可有所偏滯也

思夫人自亂于威儀爾無以釗冒

貢于非幾

亂治也威者有威可畏儀者有儀可象舉一身之則而言也蓋人受天地之中以生是以

有動作威儀之則成王思夫人之所以為人者自治於威儀耳自治云者正其身而不假於外求也貢進也成三又言羣臣其無以元子而冒進於不善之幾也蓋幾者動之微而善惡之所由分也非幾則發於不善而陷於惡矣威儀舉其著於外者而勉之也非幾舉其發於中者而戒之也威儀之治皆本一念一慮之微可不謹乎孔子所謂知幾子思所謂慎獨周子所謂幾善惡者皆致意於是也成王垂絕之言而拳拳及此其有得於周公者亦深矣蘇氏曰死生之際聖賢之所甚重也成王將崩之一日被冕服以見百官出經遠保世之言其不死於燕安婦人之手

茲既受命還出綴衣于庭越翼

日乙丑王崩

綴衣幄帳也羣臣既退徹出幄帳於庭喪大記云疾病君徹懸東首於北牖下是也

於其明
日王崩

太保命仲桓南宮毛俾爰齊侯呂伋以二千戈

虎賁百人逆子釗于南門之外延入翼室恤室宗

桓毛臣

名伋太公望子為天子虎賁氏延引也翼室路寢旁左
右翼室也太保以冢宰攝政命桓毛二臣使齊侯呂伋

以二千戈虎賁百人逆太子釗於路寢門外引入路寢
翼室為憂居宗主也呂氏曰發命者冢宰傳命者兩朝
臣承命者勲戚顯諸侯體統尊嚴樞機周密防危慮患
之意深矣入自端門萬姓咸覩與天下共之也延入翼

室為憂居之宗示天下不可一日無統也唐穆敬文武
以降閭寺執國命易主於宮掖而外廷猶不聞然後知

周家之制曲盡備豫雖一條一節亦不可廢也丁卯命作冊度

命史為冊書法度傳顧命於康

王越七日癸酉伯相命士湏村

伯相召公也召公以西伯為相須取也命士取

材木以供喪用

狄設黼屨綴衣

狄下士祭統云狄者樂吏之賤者也喪大記狄人設階蓋供喪

役而典設張之事者也黼屨屏風畫為斧文者設黼屨幄帳如成王生存之日也

牖間南嚮敷

重篋席黼純華玉仍几

此平時見羣臣覲諸侯之座也敷設重席所謂天子之席三重

者也篋席挑竹板席也黼白黑雜繒純綠也華采色也華玉以飾几仍因也因生時所設也周禮吉事變几凶

事仍几是也

西序東嚮敷重底席綴純文貝仍几

此旦夕聽事之座也

東西廂謂之序底席蒲席也綴雜采文貝有文之貝以飾几也

東序西嚮敷重豐席畫

純雕玉仍几

此養國老饗羣臣之座也豐席筍席也畫彩色雕刻鏤也

西夾南嚮敷

重筍席元紛純漆仍几

此親屬私燕之座也西廂夾室之前筍席竹席也紛雜也以元

黑之色雜為之緣漆漆几也牖間兩序西夾其席有四牖戶之間謂之辰天子負宸朝諸侯則牖間南嚮之席座之正也其三席各隨事以時設也將傳先王顧命知神之在此乎在彼乎故兼設平生之座也

越王

五重陳寶赤刀大訓弘璧琬琰在西序大玉夷玉天球

河圖在東序允之舞衣大貝鼓鼓在西房允之戈和之

弓垂之竹矢在東房

於東西序座北列玉五重及陳先王所寶器物赤刀赤削也大訓三

皇五帝之書訓誥亦在焉文武之訓亦曰大訓弘璧大琕也琬琰圭名夷常也球鳴球也河圖伏羲時龍馬負圖出於河易大傳所謂河出圖是也允國名允國所制舞衣大貝如車渠鼓鼓長八尺兌和皆古之巧工垂舜時共工舞衣鼓鼓戈弓竹矢皆制作精巧中法度故歷代傳寶之孔氏曰弘璧琬琰大玉夷玉天球玉之五重

也呂氏曰西序所陳不惟赤刀弘璧而大訓參之東序所陳不惟大玉夷玉而河圖參之則其所寶者斷可識矣愚謂寶玉器物之陳非徒以為國容觀意者成王平日之所觀閱手澤在焉陳之以象其生存也楊氏中庸傳曰宗器於祭陳之示能守也於顧命陳之示能傳也大輅在賓階面綴輅在阼

階面先輅在左塾之前次輅在右塾之前

大輅玉輅也綴輅金輅也

先輅木輅也次輅象輅革輅也王之五輅玉輅以祀不以封為最貴金輅以封同姓為次之象輅以封異姓為又次之革輅以封四衛為又次之木輅以封蕃國為最賤其行也貴者宜自近賤者宜遠也王乘玉輅綴之者金輅也故金輅謂之綴輅最遠者木輅也故木輅謂之先輅以木輅為先輅則革輅象輅為次輅矣賓階西階也阼階東階也而南嚮也塾門側堂也五輅陳列亦象成王之生存也周禮典路云若有大祭祀則出路大喪

大賓客亦如之是大喪出輅為常禮又按所陳寶玉器物皆以西為上者成王殯在西序故也二人雀

弁執惠立于畢門之內四人綦弁執戈上刃夾兩階祀

一人冕執劉立于東堂一人冕執鉞立于西堂一人冕

執戣立于東垂一人冕執瞿立于西垂一人冕執銳立

于側階升士服雀弁赤色弁也綦弁以文鹿子皮為之惠三隅矛路寢門一名畢門上及外嚮也堂

廉曰祀冕大夫服劉鉞屬戣瞿皆戟屬銳當作銳說文曰鈇侍臣所執兵從金允聲周書曰一人冕執鈇讀若

允東西堂路寢東西廂之前堂也東西垂路寢東西序之階上也側階北陛之階上也呂氏曰古者執戈戟以

宿衛王宮皆士大夫之職無事而奉燕私則從容義德有膏澤之潤有事而司禦侮則堅明守義而無腹心之

虞下及秦漢階楯執戟尚餘一二此制既廢人主接士大夫者僅有視朝數刻而周廬陛楯或環以椎埋器悍之徒有忘於復王麻冕黼裳由賓階降卿士邦君麻冕古者當深繹也

蟻裳入即位

麻冕三十升麻為冕也降升也康王吉服自西階升堂以受先王之命故由賓階也

蟻元色公卿大夫及諸侯皆同服亦廟中之禮不言升階者從王賓階也入即位者各就其位也呂氏曰麻冕黼裳王祭服也卿士邦君祭服之裳皆纁今蟻裳者蓋無事於奠祝不欲純用吉服有位於班列不可純用凶服酌吉凶之間

太保太史太宗皆麻冕形裳太保承介

圭上宗奉同瑁由阼階降太史秉書由賓階降御王冊

命

太宗宗伯也形纁也太保受遺太史奉冊太宗相禮故皆祭服也介大也大圭天子之守長尺有二寸同

爵名祭以酌酒者瑁方四寸邪刻之以冒諸侯之圭璧以齊瑞信也太保宗伯以先王之命奉符寶以傳嗣君有主道焉故升自阼階太史以冊命御王故持書曰皇由賓階以升蘇氏曰凡王所臨所服用皆曰御

后憑玉几道揚末命命汝嗣訓臨君周邦率循大卞燮

和天下用答揚文武之光訓

此成王顧命之言書之冊矣太史口陳者也皇太后

君也言大君成王力疾親憑玉几道揚臨終之命命汝嗣守文武大訓曰汝者父前子名之義卞法也臨君周邦位之大也率循大卞法之大也燮和天下和之大也居大位由大法致大和然後可以對揚文武之光訓也

王再拜興答曰眇眇予末小子其能而亂四方以敬忌

天威

眇眇予末小子其能而亂治也王拜受顧命起答太史曰眇眇然予微末小子其能如父祖治四方以敬忌天威

乎謙辭退托於不能也顧有敬遜天威嗣守文武乃受
大訓之語故太史所告康王所答皆於是致意焉

同瑁王三宿三祭三咤上宗曰饗

王受瑁為主受同以祭宿進爵也祭祭酒

也咤莫爵也禮成於三故三宿三祭三咤葛氏曰受上宗同瑁則受太保介圭可知宗伯曰饗者傳神命以饗

告太保受同降盥以異同秉璋以酢授宗人同拜王答

拜

太保受王所咤之同而下堂盥洗更用他同秉璋以酢酢報祭也祭禮君執圭瓚裸尸太宗執璋瓚亞裸

報祭亦亞裸之類故亦秉璋也以同授宗人而拜尸王答拜者代尸拜也宗人小宗伯之屬相太保酢者也太

宗供王故宗人供太保

太保受同祭噤宅授宗人同拜王答拜

酒

至齒曰噤太保復受同以祭飲福至齒宅居也太保退居此所以同授宗人又拜王復答拜太保飲福至齒者

方在喪疾歆神之賜而不甘其味也若王則喪之主非徒不甘味雖飲福亦廢也 太保降收諸

侯出廟門侯

太保下堂有司叔徹器用廟門路寢之門也成王之殯在焉故曰廟言諸侯則卿士

以下可知侯者見新君也

康王既尸天子遂誥諸侯作康王之誥

三出自應門之內大保率西方諸侯入應門左畢公率

東方諸侯入應門右皆布乘黃朱賓稱奉圭兼幣曰一

二臣衛敢執壤奠皆再拜稽首王義嗣德答拜

王出畢門立應

門內蓋內朝所在也召公主西方諸侯畢公繼周公主東方諸侯諸侯皆陳四黃馬而朱其鬣以為庭實賓諸

侯也諸侯舉所奉圭兼幣曰一二臣衛為王藩衛故曰臣衛敢執壤地所出奠贊皆再拜首至地以致敬義嗣

德云者史氏之辭謂康王宜嗣前人之德故答拜也吳氏曰秦穆公使人弔公子重耳稽顙而不拜穆公曰則未為後也蓋有後者拜不拜未為後也弔者含者禭者升堂致命主孤拜稽顙成為後者也康王之見諸侯若以為不當拜則疑未為後也此純乎吉也答拜既正其為後且知其以喪見也

太保暨芮伯咸

進相揖皆再拜稽首

冢宰及司徒與羣臣皆進相揖定位又皆再拜稽首陳戒於王

曰

敢敬告天子云云王若曰庶邦侯甸男衛惟予一人釗

報誥

康王在喪故稱名春秋嗣王在喪亦書名也

昔君文武云云羣公既皆

聽命相揖趨出王釋冕反喪服

始相揖者揖而進也此相揖者揖而退也

蘇氏曰成王崩未葬君臣皆冕服禮歟曰非禮也

謂之變禮可乎曰不可禮變於不得已嫂非溺終不援也三年之喪既成服釋之而即吉無時而可者曰成王顧命不可以不傳既傳不可以喪服受也曰何為其不可也孔子曰將冠子未及期日而有齊衰大功之喪則因喪服而冠冠吉禮也猶可以喪服行之受顧命見諸侯獨不可以喪服乎太保使太史奉冊授王于次諸侯入哭於路寢而見王於次王喪服受教戒諫哭踊答拜聖人復起不

易斯言矣春秋傳曰鄭子皮如晉葬晉平公將以幣行子產曰喪安用幣子皮固請以行既喪諸侯之大夫欲因見新君叔向辭之曰大夫之事畢矣而又命孤孤斬焉在衰經之中其以嘉服見則喪禮未畢其以喪服見是重受弔也大夫將若之何皆無辭以退今康王既以嘉服見諸侯而又受乘黃玉帛之幣使周公在必不為此然則孔子何取此書也曰至矣其父子君臣之間教戒深切著明

足以為後世法孔子何為不取哉然其失禮則不可不辨

朱子語錄或問居喪朝服曰麻冕乃是祭服顧命用之者以其以後繼統事於宗廟故也受冊用之

者以其在廟而凶服不可入故也

舊說以廟門為殯宮之門不知

是

若朝服則古者人君諒陰三年自無變服視朝

之禮第不知百官總已以聽冢宰冢宰百官各以何服莅事耳想不至使用元冠黑帶也後世既無

亮陰總已之事人主不免視朝聽政則豈可不酌其輕重而為之權制乎又況古者天子皮弁素積以日視朝衣冠皆白不以為嫌則今在喪而白布衣冠以臨朝恐未為不可但入太廟則須吉服而小變耳又或問康王釋喪服而被冕裳且受黃朱圭幣之獻諸家以為禮之變獨蘇氏以為禮之失何也對曰天子諸侯之禮與士庶人不同故孟子有吾未之學之語蓋謂此類耳如伊訓元祀十

有二月朔亦是新喪伊尹已奉嗣王祇見厥祖固
不可用凶服矣

扶君卜人師扶右射人師扶左

謂君疾時也卜當為僕聲之誤也僕人射人皆

平時贊正君位者

君薨以是舉

不忍變也人遷尸

周禮射人大喪與僕疏曰周禮太僕職掌

正王之服位射人職掌國之三孤卿大夫之位及王舉動悉隨王故知也

君夫人卒于

路寢

言死者必於正處正者曰路寢餘二者曰小寢

疏曰君謂諸侯諸侯三寢一曰小寢卒歸於正故在路寢

莊公三十二年八月公薨于路寢穀梁傳路寢正寢也寢疾居正寢正也男子不絕於婦人之手以齊終也僖公薨于小寢譏即安謂就夫人寢也陳公薨不書地文公薨于臺下襄公薨于楚宮定公薨于高寢皆非禮也

右始死

夏采掌大喪以冕服復于太祖以乘車建綏復于四郊

求之王平常所有事之處乘車玉輅於太廟以冕服不出宮也太祖始祖廟也綏用旄牛尾為之綴於幘上王祀四郊乘玉輅建太常今以復去其旒異之於生疏曰復者各依命數天子則十二人各服朝服而復於太祖之廟當升自東雷北西履危西上云臯天子復如是者三乃卷衣投於有司以篋受之升自阼階入衣於尸復而不蘇乃行死事也郊事神之處乘玉輅生時九旗有綏有旒今死去旒是異於生也君復於

小寢大寢小祖大祖庫門四郊

尊者求之備也亦他日嘗有事疏曰於小寢

者前曰廟後曰寢爾雅云室有東西廂曰廟無東西廂有室曰寢此小寢高祖以下廟之寢也王侯同大寢謂

天子始祖諸侯太祖也小祖高祖以下廟也王侯同太祖天子始祖諸侯太祖廟也兩言於廟求神備也周禮夏采以冕服復于太祖廟是也其小廟則祭供復之其小寢大寢則肆供服之四郊則夏采服之天子崩復曰天子復矣始死時呼鬼辭也不呼名臣不名君也疏曰普天率土王者一人而已故呼天子復而王者必知其呼而反矣若諸侯則曰某甫稱字也

右復

鼓人大喪則詔太僕鼓

始崩及窆時也

太僕大喪始崩戒鼓

傳達于四方

戒鼓擊鼓以警衆四方以鼓聲傳達而聞之也

大司馬大喪平

士大夫

平者正其職與其位

司士大喪作士掌事

事謂奠斂之屬疏曰始

死則有奠及至小斂大斂朝夕朔月月半薦新遷廟祖
莫大遣奠等皆是未葬以前無尸不忍異于生皆稱奠
也

宰夫大喪小喪掌小官之戒令帥執事而治之

大喪

王后世子小喪夫人以下小官士也其大官則冢宰掌其戒令治謂共辦

虎賁氏國有大

故則守王門大喪亦如之

大故謂兵災也大喪謂王崩非常之難須警備

旅

賁氏掌執戈盾夾王車而趨喪紀則衰葛執戈盾

葛葛經武

士尚輕疏曰臣為王貴賤皆斬衰斬衰麻經至葬乃服葛今王始死即服葛故云武士尚輕

大司

徒若國有故則致萬民于王門令無節者不行于天下

大故謂王

崩及寇兵

司險國有故則藩塞阻路而止行之以其

屬守之唯有節者得達之

有故喪災及兵也閉塞要路之道備奸寇也疏曰喪謂

王

天子崩巷市七日諸侯薨巷市三日

疏曰若居天子諸侯之喪

必巷市者以庶人憂戚無復求覓財利要有急湏之物不得不求于邑里之內而為巷市

右戒臣民

射人大喪與僕人遷尸

僕人太僕也僕人與射人俱掌王之朝位也王崩小斂大斂遷

尸於室堂朝之象也

檀弓扶君卜人師扶右射人師扶左君薨以是舉疏曰始死于北牖下遷尸于南牖下

又云小斂于戶內是遷尸于室小斂訖遷尸于戶外又

遷尸大斂于阼階大斂訖及遷尸于西階以入棺是遷

尸于室堂云朝之象也者君所在而臣之朝故云朝之象

王府大喪共角枕角柩

角枕以枕尸角柩角也。以楔齒士喪曰楔齒令可飯。含疏曰按既夕禮楔皂如輓上兩末狀如枇杷拔屈。

中央楔齒

始死遷尸于沐輴歛衾去死衣小臣楔齒用角

柩綴足用燕几君大夫士一也。

沐謂所設沐第當牖者也。疏曰遷尸于沐者

尸初在地冀生氣復既而不生故更遷尸于沐而離初死處以近南當牖也。輴覆也。歛衾者將擬大歛之時衾被也。楔齒解見上綴足用燕几者為尸應著屨。恐足辟戾亦使小臣用燕几綴拘之令直也。幕人

大喪共帷幕布綴

詳見陳殯具條

委人喪紀共其木材

木材給帳

事此已上兩條陳殯具條通用

右遷尸楔齒綴足帷堂

天子崩告喪曰天王登假告訃也登上也假已也上已者若仙去云耳

右命訃

唯天子之喪有別姓而哭

使諸侯同姓異姓庶姓相從而為位別于朝覲爵同同位

疏曰此言朝覲爵同同位然覲禮諸侯受舍于朝同姓西面異姓東面與此不同者覲禮先公而後侯先侯而後伯亦是爵同位同但同姓之中先爵尊耳

檀弓

肆師大喪令外內命婦

序哭

序使相次秩大夫妻皆為外命婦其內命婦即下經內命女是

疏曰按注六卿以出及朝廷卿

也謂三夫人以下至女御也哭法以服之輕重為先後若然則內命婦為王斬衰居前諸臣之妻從服齊衰者居後也

內宗大喪序哭者

內宗凡內女之有爵者序次外內宗及命婦哭位

九嬪若有賓客則從后大喪帥叙哭者亦如之

亦從后帥猶導

也后哭衆之次叙者乃哭

疏曰外內命婦哭時皆依

尊卑命數在后後為前後列哭之故須帥導使有次序

也唯天子之喪別姓而哭肆師序哭內

宗序哭九嬪帥叙哭皆朝夕哭條所通用 司士凡士

之有守者令哭無去守

疏曰此文承大喪之下令哭無去守則大夫士有使役守當須

同為天子斬棄不可廢事

既正尸子坐于東方卿大

空官故令哭不得去守也

夫父兄子姓立于東方有司庶士哭于堂下北面夫人

坐于西方內命婦姑姊妹子姓立于西方外命婦率外

宗哭于堂上北面

正尸者謂遷尸牖下南首也子姓謂衆子孫也姓之言生也其男子立于

主人後女子立于夫人後世婦為內命婦卿大夫之妻
為外命婦外宗姑姊妹之女疏曰人君初喪哭位子
坐于東方者子謂世子世子尊故坐于東方謂室內尸
東故士喪禮云主人入坐于牀東是也子姓謂眾子孫
所生也准士禮父兄子姓大功以上正立于室內東方
今此經總云卿大夫父兄子姓立於東方以士禮言之
當在室內但諸侯以上位尊不可不正定世子之位故
顧命康王之入翼室恤宅宗不宜與卿大夫父兄子姓
俱在室內也卿大夫等或當在戶外之東方遙繼主人
之後有司庶士哭于堂下北面者以其卑故在堂下北
面則諸父兄子姓等雖小功以下皆在堂上西面也夫
人坐于西方者亦近尸故士喪禮云婦人俠牀東面士
禮畧但言俠牀人君則當以帷幃之也內命婦則子婦
也姑姊妹謂君姑姊妹也子姓君女孫皆立于西方也
外命婦率外宗哭于堂上北面者外命婦謂卿大夫妻
外宗謂姑姊妹之女外命婦外宗等疏于內命婦故在

戶外婦人無堂下之位故皆堂耳北面也

右哭位

小宰受其含祔幣玉之事

王喪諸侯諸臣有致含祔幣玉之事

右受含祔幣玉

司常大喪共銘旌

銘旌王則太常也士喪禮曰為銘各以其物疏曰士喪禮為銘各以其

物云則以緇長半幅頰末長終幅廣三寸書名于末此蓋其制也按禮緯云天子之旌高九仞大夫五仞士三仞按士喪禮竹杠長三尺則死者以尺易仞天子九尺諸侯七尺大夫五尺士三尺其旌身亦以尺易仞也

書銘自天子達于士其辭一也男子稱名婦人書姓

與伯仲

書銘謂書亡人名字于旌旗也天子書名于太常諸侯以下書于旌旗男子稱名此並殷禮周

世則尚文臣不名君天子復曰臯天子復矣

右為銘

壘人大喪之大泚設斗共其壘壘

斗音主 斗所以沃尸也壘尸以壘酒使

之香美者鄭司農云壘讀為徽 疏曰鄭云壘尸以壘酒使之香美者按肆師云大喪築壘則此壘酒中魚有鬱金香草故得香美也司農云壘讀為徽者以壘壘尸故以徽為莊飾義也

鬱人大喪之

泚共其肆器

肆器陳尸之器喪大記曰君設大盤造冰馬大夫設夷盤造冰馬士併瓦盤無冰設

林檀第有枕此之謂肆器天子亦用夷盤

肆師大喪大泚以壘則築壘

鬱音

煮 築香草煮以為鬯以浴尸香草鬱也

疏曰上小

宗伯大喪以鬯澍則肆師與之築鬱金香草和鬯酒以

浴之使尸

典絲喪記其其絲續組文之物

以給線縷著肝口綦

之香也

握之屬青與赤謂之文

著直畧反下同徐猪畧反

疏曰此鄭並據士喪禮而言云以給線縷者謂所裁縫

皆用線縷釋經絲也云著肝口綦文之屬者釋經縷組

按士喪禮握手元纁裏著組繫按喪大記屬續以俟絕

氣內則云屨著綦鄭云綦屨繫是用縷組之事也云

青與赤謂之文續人職文繡之屬亦用絲故連言也

內司服后之喪其衣服凡內具之物

內具紛帨線續

曰后喪所共衣服者正謂襲時十二稱小歛十九稱大

歛百二十稱及內具之物也按內則事舅姑有紛帨線

續擊裘故死者入壙亦兼有數物以

上兩條下陳小歛大歛衣皆通用之

公龍卷衣一

元端一朝服一素積一纁裳一爵弁二元冕一褱衣一

朱綠帶申加大帶於上

卷音衮
飾之雜以朱

綠帶者龍衣之帶
朱綠異于生也此帶

亦以素為之申重也重于草帶也草帶以佩韍必言重
加大帶者明雖有變必備此二帶也士龍三稱子羔龍
五稱今公龍九稱是尊卑龍數不同矣諸侯七稱天子
十二稱與疏曰公龍以卷衣上服最在內者公身貴
故以上服親身欲尊顯加賜故褱衣最外而細服居中
也子羔賤故卑服親身也元端二者賀云燕居之服元
端朱裳也朝服一者緇衣素裳公曰視朝之服也素積
一者皮弁之服公視朔之服也纁裳一者賀云冕服之
裳也亦可驚義任取中間一服也爵弁二者元衣纁裳
二通也此是始命之服示之重本故二通也招魂君亦
用爵弁服也元冕之下又取一也褱衣一者所加賜之
衣最上華君賜也自褱衣至此合爵弁二通合九稱注

云朱綠帶者，龍衣之帶，飾以雜朱綠，異于生者也。此帶既非草帶，又非大帶，祇是衣之小帶。衣帶以素為之，而朱綠飾之，亦異于生時也。申重也，重于草帶也。者謂於草帶之上，重加此大帶，知非對小朱綠帶為重者，以朱綠小帶散在于衣，非是總束其身。若總束其身，唯有草帶大帶，故知對草帶為重者，必見草帶與大帶者，明雖有變，必備此二帶。天子諸侯以下，龍之數士喪禮，龍三稱子羔，龍五稱此。文公龍九稱是尊卑，龍數不同。唯天子諸侯無文，故約之云。諸侯七稱，天子十二稱，與與者疑辭也。君錦冒黼殺綴旁七凡

冒質長與手齊殺三尺

疏曰：冒謂襲後小斂前所用，以黼尸也。冒有質殺者，作兩囊，每

輒橫縫合一頭，又縫連一邊，餘一邊不縫。兩囊皆然也。上者曰質，下者曰殺。君質用錦，殺用黼。鄭注：士喪禮云：「冒黼尸者，制如直囊。」上曰質，下曰殺。質正也，其用之先以殺，黼足而上，後以質，黼首而下，旁綴七者，不縫之邊。

上下安七帶綴以結之故云綴旁七也凡冒質長與手齊凡謂貴賤冒通名也言冒之質從頭韜來至下長短與手相齊也殺三尺者殺從足韜上長三尺

凌人大喪共夷槃冰

漢制廣大盤廣

八尺長丈二尺深三尺漆赤中即夷盤

君設大盤造冰焉設牀檀第有枕

造猶內也檀第袒箕也謂無席如浴時牀也禮自仲春之後尸既小斂先納冰盤中乃設牀于其上不施席而遷尸焉秋涼而止

典瑞大喪共飯玉含玉

飯玉碎玉以糴米也含玉柱左右齟

及在口中者雜記曰含者執璧將命則是璧形而小耳疏曰按玉府已云大喪共含玉此又言之者蓋玉府主作之此官主其成事而共之

玉府大喪共含玉

疏曰玉者含玉辟形而小以為口實

含人喪紀共飯米

飯所以實口不忍虛也君用梁大夫用稷士用梁皆四朴實者唯盈

天子飯九貝

此蓋夏時制也周禮天子飯用玉

舍一牀鬲一牀遷

尸於堂又一牀皆有枕席君大夫士一也

疏曰言此三節各自有牀

皆有枕席唯舍一時暫徹枕使平面故士喪禮商祝徹枕設中是也舍鬲及堂皆有席故鄭注士喪禮商祝鬲衣于牀牀次舍牀之東衽如初又注士禮設牀第于兩楹之間衽如初有枕云衽寢卧之席亦下莞上簟是也君大夫士一也者貴與賤同然也

右陳沐浴鬲飯舍之具

小宗伯王崩大肆以秬鬯泚

泚亡婢反杜音泚李士辨反鄭司農云大肆大浴

也杜子春讀泚為泚以秬鬯浴尸元謂大肆始陳尸伸之疏曰肆訓為陳為伸故也以秬鬯浴尸使之香也

大職祝云大喪始崩以肆訖渰尸小祝又云大喪春
贊渰彼二官以掌之此言之者察其不如儀也

官大祝大喪以肆訖渰尸肆訖所肆訖為小祝大喪

贊渰故書渰為渰杜子春云當女御大喪掌沐浴王

后之喪疏曰王及后喪沐浴用潘浴用湯禮男子不死

于婦人之手今喪亦使女御浴者按士喪禮浴時男抗

衾則不使婦人今王喪婦人或亦管人汲不說緇屈

供給湯物亦得謂之掌也天官

之畫階不升堂授御者御者入浴小臣四人抗衾御者

二人沐浴水用盆沃水用料浴用絺巾拒用浴衣如他

日小臣爪足浴餘水棄于坎其母之喪則內御者抗衾

而浴

管掌管簫之人又古禮反掌管舍之人說吐活反

重形也

拒拭也爪足斷足爪也

疏曰緇汲水瓶索也

遽促于

事故不說去井索但縈屈就之于手盡階不升

堂者以

水從西階而升知西階者以士喪禮云為塋于

西牆下

故也沃水用料酌盆水沃尸絺細葛浴時除垢

拒用浴

衣浴罷用生時浴衣拭尸令燥也如他日謂如

平生尋

常之日浴盤餘汁棄之坎中坎是甸人所掘於

階間取

土為竈之坎其母之喪則內御者抗衾而浴者

內外宜

別故用內御舉衾內御婦人亦管人汲事事如

前唯浴

用管人汲授御者差沐於堂上士沐梁大

人不同

耳管人汲授御者差沐於堂上士沐梁大

夫沐稷甸人為塋於西牆下陶人出重鬲管人受沐乃

煮之甸人所取徹廟之西扉薪用爨之管人授御者沐

乃沐沐用瓦盤拈用巾如他日小臣爪手翦湏濡濯棄

於坎

差七何反。莛音後。陶音桃。重直龍反。鬲音歷。煮諸許反。匪扶味反。鬻七遄反。差浙也。浙飯米取其

潘以為沐也。沐沃用料。沐于盤中。文相變也。士喪禮沐。稻此云。士沐梁。蓋天子之士也。以差率而上之。天子沐

黍與

疏曰。差謂浙米取其潘汁也。君沐梁。大夫沐稷

士沐梁者。皆取用其米取其汁而沐也。將沐之時。甸人

之官為莛于西牆下。土莛。整竈。甸人具此為莛。竈以煮

沐。汁陶人作瓦器之官。重鬲者。謂縣重之鬻也。是瓦瓶

受三升。以沐米為粥。實于瓶。以疏布罍口繫以篋。縣之

覆以蓆。席管人受沐乃煮之者。浙于堂上。管人亦升。盡

等不上堂而就御者。受浙汁下往西階。于莛。竈鬲中煮

之也。鬻然也。甸人為竈。竟取復餽。人所徹正寢。西北匪

以然。竈煮沐汁也。謂正寢為廟神之也。然舊云。匪是屋

簷也。謂抽取屋西北簷也。熊氏云。匪謂西北隅。匪隱之

處徹取屋外當扉隱處薪義亦通也取此薪而用者示
主人已死此堂無復用故取之也管人授御者沐者煮
汁熟而管人又取以升階授堂上御者御者受汁入為
尸沐也士喪禮云沐巾一又云拒用巾注云拒晞也清
也如他日者事事亦如平生也小臣沐竟而剪手爪又
治湏象平生也濡濯棄于坎者皇氏云湏謂煩攪其髮
濯謂不淨之汁也言所濡濯汁棄于坎中鄭注士喪禮
云中櫛浴衣亦并棄之于坎按既夕禮云掘坎南順廣
尺輪二尺深三尺南其壤此沐汁棄于坎則浴汁亦然
差是差摩故云浙詩云釋之叟叟是釋浙米也沐與浴
俱有料俱有盤浴云用料
沐云用盤是文相變也

右沐浴

大祝大喪相飯

疏曰云相飯者浴訖即飯舍故言相飯
也不言相舍者大宰云大喪贊贈玉舍

玉此故不言

大宰大喪贊含玉

助王為之也疏曰謂助嗣王

右飯含襲

左傳皇武子曰宋先代之後於周為客天子有喪拜焉

宋吊周喪王特拜謝之疏曰禮吊喪之法皆人主拜其吊者謝其勤勞吊者不答拜以其為事而來不自同于賓客此皆據吊及主人敵禮以上若其臣下來吊則主人不拜宋是前代之後王以敵禮待之故拜其來弔其餘諸侯者則否

右受弔

小歛於戶內大歛於阼君以簟席

簟細葦也下有莞

司服大

喪其其歛衣服掌其陳序

疏曰云大喪王喪其中魚小喪也小歛皆十九稱大歛則

士三十稱大夫五十稱諸侯皆百稱天子蓋百二十稱云

小歛布絞縮者一橫者

三君錦衾大夫縞衾士緇衾皆一衣十有九稱君陳衣

於序東大夫士陳衣于房中皆西領北上絞紵不在列

絞既歛所用束豎之者疏曰布絞者以布為絞縮從也謂從者一幅豎置于尸下橫者三幅亦在尸下從者

在橫者之上每幅之末析為三片以結束為便也君錦

衾大夫縞衾士緇衾皆一者謂大夫士等各用一衾故

云皆一舒衾于此絞上衣十有九稱者君大夫士同用

十九稱衣布于衾上然後舉尸于衣上屈衣裹又屈衾

裏之然後以絞束之君陳衣于序東大夫士陳衣于房

中者謂將小歛陳衣也房中者東房也大夫士唯有東

房故也絞給不在列者謂不在十九稱之列不入數也小斂未有終因絞不在列而言終耳

君無

遂無遂者不陳不以斂疏曰君無遂者國君陳衣及斂悉宜用已衣不得陳用他人見遂送者

小

歛君大夫士皆用複衣複衾

同上

凡陳衣者實之篋取

衣者亦以篋升降自西階

取猶受也

凡陳衣不誦非列采不

入絺綌紵不入

不誦謂舒而不卷也列采謂正色之服也絺綌紵者當暑之襲衣也髀尸重形

冬夏用袍及斂則用正服

疏曰列采謂五方正色之采非列采謂雜也不入陳之也襲衣亦不陳復衣

不以斂

詳見復條

封人凡喪紀則飾其牛牲

疏曰喪紀有牲者除朝夕

奠用肺醢以外大小斂朔月月半薦新奠祖奠大遣等皆有牲牢

牛人喪事共其奠

二 謂殷奠遣奠也喪所薦饋曰奠 疏曰喪自未葬以

前無尸飲食直奠停置于神前故謂之為奠朝夕之

奠無等卑皆脯醢酒而已無牲體殷大也唯有小斂大

斂朔月月半薦新祖奠及遣奠時有牲體大遣奠非直

云喪所薦饋曰奠以無尸故也 地官 圉人喪紀共

其脯腊凡獸之物 地官 獸人凡喪紀共其死獸生獸 天

官 腊人喪紀共其脯腊凡乾肉之事 廩人 廩音魚本

又作魚又 音 喪紀共其魚之鱸亮 天 醢人凡祭祀共薦羞之豆

實喪紀亦如之 以上八官並陳大斂奠至祖奠遣奠條通用

右陳小斂衣奠

小歛主人即位於戶內主婦東面乃歛

疏曰主人即位於戶內者以初

時尸在牖下主人在尸東今小歛當戶內故主人在戶內稍東喪大記上始死條卜人右射人左遷尸條

射人僕人遷尸並此條通用當互考也

小宗伯王崩及執事涖小歛大

歛帥異姓族而佐

執事大祝之屬莅臨也親歛者並事官之屬為之異族佐歛疏者可以相

助

疏曰大祝職云大喪贊歛明大祝執事小宗伯莅

之云親歛者蓋事官之屬為之者以其諸處更不見主歛事者事官又主工巧之事以無正文故疑事官之屬為之也云異族佐歛疏者可以相助者此異族據姓而

言

大祝大喪贊歛

冬官主歛事大祝佐之春官

君之喪大胥是

歛衆胥佐之

胥樂官也不掌喪事胥當為祝字之誤也疏曰大祝是接神者故使之執歛事也

是猶執也衆祝佐之者衆祝喪祝也衆祝賤故副佐于大祝也

凡歛者袒遷尸者齎

袒者于事便也疏曰凡歛謂執大小歛事也事多故袒為便也遷尸者齎謂大歛于地乃遷尸入棺之屬事

少故齎也

小歛之衣祭服不倒

尊祭服也歛者要方散衣有倒疏曰祭服謂死者

所得用祭服以上也小歛十九稱不恙著之但用裏尸要取其方而衣有倒領在足間者唯祭服尊雖散不著

而領不倒在足也同上

小歛大歛祭服不倒皆左衽結紱不紐

紐女九反舊而慎反左衽衽鄉左反生時也疏曰皆左衽大歛小歛同故云皆也衽衣襟也生鄉右手解抽

帶便也死則襟向左示不復解也生時帶並為屈紐使易抽解若死則無復解義故絞束畢結之不為紐也

同上

自小歛以往用夷衾夷衾質殺之裁猶冒也

疏曰往猶

後也小歛前用冒故不用夷衾自小歛後衣多不可用
冒故用夷衾覆之也士喪禮云撫用夷衾之柩之衾也
裁猶制也言夷衾所用上齊荼手下三尺所用緇色及
長短制度如冒之質殺也但不復為囊及旁聯也熊氏
分質字屬上殺字屬下為句其義非也然始死撫用歛
衾是大歛之衾自小歛以前覆尸至小歛時君錦衾大
夫緇衾士緇衾用之小歛歛訖則制夷衾以覆之其小
歛之前所用大歛之衾者小歛以後停而不用至將大
歛及陳衣又更制一衾主用大歛也今按士喪禮撫用
歛衾疏云大歛之時兩衾俱用一衾承薦于下一衾以
覆尸則始死所用之衾至大
歛即以承薦非停而不用也

鋪絞綫踊鋪衾踊鋪衣

踊遷尸踊歛衣踊歛衾踊歛絞綫踊

皆孝子踊也同上

歛者

既歛必哭

疏曰歛者即大祝衆祝之屬也既歛是歛竟也歛竟必皆哭也所以然者以其與已者或

臣舊或有恩今手為執事專心則增感故哭也

卒歛主人馮之踊主婦亦如

之主人袒說髻括髮以麻婦人髻帶麻于房中

士既殯說髻此

云小歛蓋諸侯禮也士之既殯諸侯之小歛于死者俱三日也婦人之髻帶麻于房中則西房也天子諸侯有左右房疏曰既歛主人馮之踊主婦亦如之主人袒者向小歛不袒今方有事故袒衣也士喪禮馮尸已竟而云髻髮袒此未括髮先云袒者或人君禮也說髻者髮幼時剪髮為之至年長則垂著兩邊明人子事親恒有孺子之義也若父死說左髻母死說右髻二親並死則並說之親沒不髻是也今小歛竟喪事已成故說之也按鄭注士既殯說髻今歛而說者人君禮也括髮以麻者人君小歛說髻竟而男子括髮用麻也士小歛後亦括髮但未說髻耳婦人髻亦用麻對男子括髮也帶麻于房中者帶麻麻帶也謂婦人要經也士喪禮云婦

人之帶牡麻結本在房鄭云婦人亦有苴經但言帶者記其異此齊衰婦人斬衰婦人亦苴經也男子帶經于東房而婦人帶經在西房既與男子異處故特記其異也云天子諸侯有左右房者欲明經房中是西房也天子路寢制如明堂熊氏曰左房則東南火室也右房則西南金室也諸侯路寢室在于中房在室之東西也

右小斂

按小斂所用之日以喪禮義考之但有死三日而斂若并死日而數二日而天子諸

侯三日小斂大夫士二日小斂此乃小斂日數雖引以為在禮有之然無所考天子諸侯殯葬日月與士不同則斂日亦當不同故載其詳于喪禮義而記其畧于此

大祝大喪徹奠

疏曰此文乃承大喪之下故奠為始死之奠小斂大斂奠並大祝徹之

右徹始死奠

主人即位襲帶經踊

即位阼階之下位也有嚴經乃踊

拜訖襲衣加要帶首經于序東復位乃踊也士喪禮先

踊乃嚴經此先嚴經乃踊士為卑也此據諸侯為尊故

云尊卑

相變也

母之喪即位而免

記異者禮斬衰括髮齊衰免以成服而冠為母重初

亦括髮既小斂則免

疏曰為父喪拜賓竟而即阼階

下位又序東帶經猶括髮若為母喪至拜賓竟即位時

不復括髮以免代之免以嚴經至大斂

乃奠

小奠斂

乃成服也所以異于父者也

同上

曰拜賓嚴經踊竟後

賓出徹帷

君與大夫之禮也士卒斂則徹帷徹或為

廢

疏曰士小斂竟而徹帷此至小斂竟下階拜賓賓

出後乃除帷是人君及大夫禮舒也注云士卒斂則徹

帷者士喪禮文喪大記未小斂受弔有庶子不受弔

宋成公如鄭二條奉尸夷于堂有婦人迎送不下堂一

條又殯後受弔條有君弔見尸
柩而後踊皆此條通用當互考

右韻帶經小斂奠

挈壺氏

挈劉苦結反一音結又戶結反

凡喪縣壺以代哭者皆以水火

守之分以日夜

鄭司農云縣壺以為漏也代更也禮未大斂代哭以水守壺者為沃漏以火守

壺者夜則視刻數也分以日夜者異晝夜漏也漏之箭晝夜共百刻冬夏之間有長短焉太史立成法有四十
八箭疏曰禮未大斂代哭者未殯以前無問尊卑皆
哭不絕聲大斂之後乃更代而哭亦使哭不絕聲大夫
以官士親疎代哭人君尊
又以壺為漏分更相代

君喪虞人出木角狄人出

壺雍人出鼎司馬縣之乃官代哭

代更也未殯哭不絕聲為其罷倦既小斂

可以為漏刻分時而更哭也疏曰虞人掌山澤之官故出木與角狄人樂吏主挈壺漏水之器故主壺雍人主烹飪故出鼎所以用鼎及木者冬月恐水凍則鼎漏遲遲更無準則故取鼎煖水用虞人木爨鼎煮之故取鼎及木也司馬夏官卿也其屬有挈壺氏掌知漏事故司馬自臨視縣漏之時節故挈壺氏云凡喪縣壺以代哭者縣漏分時使均其官屬更次相代而哭使聲之不絕者也

右代哭

委人喪紀共其新烝木

薪烝給炊及燎木林給帳事

司烜氏凡

邦之大事共墳燭庭燎

墳大也樹于門外曰大燭于門內曰庭燎疏曰大事謂若大

喪紀大賓客之事也庭燎在大寢之庭

君堂上二燭下二燭

燭所以照燭也滅燎

而設燎 疏曰有喪則于中庭終夜設燎至
曉滅燎而日光未明故湏燭以照祭饌也

右設燎

大斂於阼

詳見陳小斂衣條

大斂布絞縮者三橫者五布紵

二衾君大夫士一也君陳衣於庭百稱北領西上絞紵

如朝服絞一幅為三不辟紵五幅無紵

辟補麥反紵丁覽反二衾者

或覆之或薦之如朝服者謂布精粗朝服十五升小斂之絞廣終幅折其末以為堅之強也大斂之絞一幅三折用之以為堅之急也紵以組類為之綴之領側若今被識生時禪被有識死者去之異于生也 疏曰大斂布絞縮者三者謂取布一幅分裂之作三片直用之三片則共是一幅兩頭裂中央不通橫者五尺又取布二

幅分裂作大片而用五片橫之於縮下也布衿者皇氏云衿禪被也取置絞束之下撰用以舉尸也孝經云衣衾而舉之是也今按經云衿在絞後衿或當在絞上以絞束之且君衣百稱又通小斂與禭之衣非單絞所能舉也又孝經云衾不云衿皇氏之說未善也二衾者小斂君大夫士各一衾今至大斂又各加一衾為二衾其衾所用與小斂同但此衾一是始死覆尸者故士喪禮云輴用斂衾注云大斂所併用之喪一是大斂時復制又注士喪禮之衾二者謂始死斂衾今又復制士既然則大夫以上一爾君陳衣于庭百稱北領西上者衣多故陳在庭為榮顯按鄭注雜記篇以為禭禮大夫五諸侯七上公九天子十二稱則此大斂天子當百二十稱上公九十稱諸侯伯子男七十稱今云君百稱者據上公舉全數而言之餘可知也或大斂禭五等同百稱也北領者謂尸在堂也西上者由西階取之便也絞一幅為三不辟者辟尸在堂也言小斂絞全幅析裂其末為三而

大斂之絞既小不復臂裂其末紵五幅無紵紵舉尸之
禪被也註堅之強解小斂衣少用全幅布為絞欲得堅
束力強也堅之急解大斂一幅分為三片之意凡物細則束縛牢急以衣多故湏急者也 大斂君

大夫祭服無算君褶衣褶衾大夫士猶小斂也

褶音牒 褶衾

也君衣尚多去其著也 疏曰祭服謂死者所得用祭
服以上也算數也大斂之時所有祭服皆用之無限數
也注謂君多去其著者經云大夫士猶小斂則復衣復
衾也據主人之衣故用複若襚亦得用裕也故士喪禮
云襚以褶是也同上 陳小斂衣條凡 典瑞駟圭璋
陳衣者寔之篋以下此條通用當互考

璧琮琥璜之渠眉疏辟琮以斂尸

駟音祖 於大斂馬加之也駟者

讀為組與組馬同聲之誤也渠眉玉飾之溝瑒也以組
穿聯六玉溝瑒之中以斂尸圭在左璋在首琥在右璜

在足壁在背琮在腹蓋取象方明神之也疏壁琮者通于天地疏曰於大歛焉加之也者以其六玉所與玉為飾明在衣裳之外故知在大歛後也駟讀為組詩有執轡如組聲之誤為駟云渠眉玉飾之溝瑋也者此六玉兩頭皆有孔又於兩孔之間為溝渠如溝之兩畔稍高為眉瑋故云以組穿聯六玉溝瑋之中以歛尸云圭在左以下皆約大宗伯云青圭禮東方之等以尸南首而置此六玉焉云蓋取象方明神之也者按觀禮設方明上圭下璧無壁琮此云象者彼注上下之神非天地至貴謂日月之神故上下不用壁琮此中有壁琮者象天地若然此言象方明也者直取置六玉于六處不取玉形之義入按大宗伯璧禮天琮禮地今此璧在背在下琮在腹在上不類者以背為陽腹為陰隨尸腹背而置之故上琮下璧也云疏壁琮者通于天地者天地為陰陽之主人之腹背象之故云疏之通天地也

君即位而為裨歲壹漆之歲

馬裨蒲歷反徐房益反裨謂地棺親尸者裨堅著之

言也歲一漆之若未成然歲謂虛之不合疏曰君

諸侯也言諸侯則王可知也裨也棺也漆之堅強覽

然也人君無論少長而體尊備細故一即位而造為此

棺也古者天子裨內又有水兕而諸侯無但用杙在內

以親尸歲一漆之者每年一漆示如未成也唯云漆杙

則知不漆杙尚深邃也疏曰四重

棺外屬等天子之棺四重者水牛兕牛皮二物重

故為一重也又杙為第二重也又屬為第三重也又大

棺為第四重也四重凡五物也以次而差之天子大棺

厚八寸屬裨四寸又二水兕草棺被之其厚三寸疏云

皮六寸合二尺四寸也

二皮並不能厚三寸故合被之令各厚杙棺一疏曰杙

三寸也二皮能濕故最在裏近尸也

概也村亦能濕故次皮也杙惟一種諸侯無草則杙親

尸也君即位為裨是也杙即概木爾雅云概杙一物二

名名概又

梓棺二

疏云柁棺之外又有屬棺屬棺之外又有大棺與屬棺並用梓故云二也

四者皆周

疏云四四重也周匝也謂四重之棺上下四方悉周匝也唯櫛不周下有茵上有枕席故

也棺束縮二衡三衽每束一

衡亦當為橫衽今小要衽或作漆或作髹疏曰棺

束者古棺木無釘故用皮束合之縮二者縮縱也縱束用二行也衡三者橫束三行也衽每束一者衽小要也其形兩頭廣中央小也既不用釘棺但先鑿棺邊及兩頭合際處作坎形則以小要連之今固棺並相對每束之處以一行之衽連之若豎束之處則豎著其衽以連棺蓋及底之木使與棺頭尾之材相固漢時呼衽謂之小要也

君裏棺用朱綠用雜金錯

錯子南反以琢著裏

錯所疏曰

裏棺謂以繒貼棺裏也朱繒貼四方綠繒貼四角定本經中綠字皆作琢琢謂錯琢朱繒貼著于棺也用雜金

錯者錯釘也舊說云用金釘又舍人喪紀共熬穀熬

用象牙推之以琢朱綠者棺也

者鑄於棺旁所以感蚍蜉也疏曰殯時設之樽熬

以感蚍蜉又有魚腊香蚍蜉欲向棺故植此以感之者

也熬君四種入筐加魚腊焉熬煎穀也士喪禮曰熬黍

一筐大夫三種加以梁君四種加以稻四筐則手足皆

一其餘設于左右疏曰加魚腊者魚腊謂乾腊按郊

特牲士腊用兔少牢大夫腊用麋天子

諸侯無文當用六獸之屬亦為感蚍蜉

帷幕亦綬為賓客飾也帷以帷堂或與幕張之於庭帟

堂亦帷掌次凡喪王則張帟三重張帟樞上承塵也

之也司几筵凡喪事設葦席右素几其柏席用萑蒲純諸

侯則粉純每敦一几

柏鄭音椁劉依司農音迫謂凡奠也崔如蓐而細者鄭司農喪事

云柏席迫地之席葦居其上或曰柏席載黍稷之席元謂柏椁字磨滅之餘椁席箴中神坐之席也敦讀曰燾燾覆也棺在殯則椁燾既窆則如見背謂覆之周禮雖合葬及同時在殯皆異几體寔不同祭於廟同几精氣合歲才浪反疏曰喪事謂凡奠也者言凡非一之義士喪禮始死之奠乃至小斂之奠亦設于地未有席至大斂奠乃有席殯後則有朝夕奠朔月奠大夫以上魚有月半奠并有薦新奠葬時又有遷奠祖奠大遣奠葬乃廢奠而虞祭也故鄭云謂凡奠也云棺在殯則椁燾者禮弓云天子散塗龍輅以椁是也云既窆則如見者見謂道上帳帷荒將入歲以覆棺言見者以其棺不復見唯見帷荒故謂之見也其二處皆當覆故云敦也云皆異几體寔不同者

凡凶事仍几

鄭司農云吉事變几變更其質謂有

解經每敦一几之義

飾也仍因也因其質謂無飾也顧命牖間南嚮西序東嚮東序西嚮皆仍元謂吉祭主祭宗廟裸于室饋食于堂釋于材每事易几神事文示新之也凶事謂凡朝夕相因喪禮畧疏曰按檀弓云虞而立尸有几筵者據大夫士而言按士喪禮大斂則有席而云虞始有筵者以其几筵相將連言其寔虞時始有几其筵大斂即有也天子諸侯禮大初死几筵並有故上云几喪事設葦席右素几也凡几之長短阮謏云几長五尺高五尺廣五尺馬融以為長三尺舊圖以為几兩端赤中央黑也

右陳大斂衣及殯奠之具

君將大斂子弁經即位於序端卿大夫即位於堂廉楹西北面東上父兄堂下北面夫人命婦尸西東面外宗

房中南面小臣鋪席商祝鋪紼衾衣士盥於盤上士
舉遷尸於斂上卒斂宰告子馮之踊夫人東面亦如之

子弁經者未成服弁如爵弁而素大夫之喪子亦弁經
疏曰子弁經即位於序端者序謂東序端謂序之南
頭也卿大夫即位于堂廡楹西者卿大夫謂羣臣也堂
廡謂堂基南畔之廡稜之上楹謂南近堂廡者子位既
在東序端故羣臣立于基上東楹之西也按隱義云堂
廡即堂上近南雷為廡也北面東上者在基上俱北面
東頭為上也子在東尸在阼階故在基者以東為上也
又兄堂下北面者謂諸父謂諸兄不在仕者以其賤故
在堂下而鄉北以東為上也若士則亦在堂下外宗房
中南面者外宗君之姑姊妹之女及姨舅之女也輕故
在房中而鄉南也皇氏云當在西房以東為上也今謂
尸在阼大夫命婦在尸西北外宗等當在東房小臣鋪

席者謂下筵上簟敷于阼階上供之斂也士喪禮云布席如初注云亦下筵上簟也鋪于阼階上於堂南北為少南商祝鋪絞紼衾衣者商祝亦是周禮喪祝也其鋪絞紼衾衣等致於小臣所鋪席上以待尸士盥于盤上者士亦喪祝之屬也周禮喪祝上士二人中士四人下士八人是將應舉尸故先盥手於盤上也雜記云士盥于盤北是也士舉遷尸于斂上者斂上即斂處也卒斂者大斂衣裳畢也宰告者大宰也斂畢大宰告孝子道斂畢也子馮之踊者孝子待得告乃馮尸而起踊夫人東面亦如之者亦馮尸而踊踊者夫人命婦俱東嚮于尸西今獨云夫人馮者命婦賤不得馮也馮竟乃斂于棺注云子弁經者未成服者成服則著喪冠也此云弁經是未成服此雖以大斂為文其小斂時子亦弁經君大夫士之子皆然故雜記云小斂環經公大夫士一也

右大斂

天子七日而殯

尊者舒卑者速重送終禮物其數既多許其申遂故曰

疏曰天子諸侯既尊

月緩也

君大夫鬻瓜實於綠中

鬻音舜綠當為角謂棺內四隅也鬻亂髮也

將實瓜髮棺中必為小囊盛之此綠或為篋

君盖用漆三衽三束

用漆者用塗合

牝壯之中也衽小要也用漆謂漆其衽合棺縫際也束謂以皮束棺也棺兩邊

疏曰君盖用漆者盖棺上盖

各三衽每當衽上輒以牛皮束之故云三衽三束也

天子之殯也敢塗龍輅以

棹

敢木以周龍輅如棹而塗之天子殯以輅車畫轅為龍疏曰敢叢也謂用木叢棺而四面塗之龍輅者

殯時輅車載柩而畫轅為龍以

加斧於棹上畢塗屋

斧謂

之黼白黑文也以刺繡于祿幕加棹以覆棺已乃屋其上畫塗之疏曰斧謂繡覆棺之衣為斧文也先取四

面為棺使上與棺齊而上猶開也以棺衣從槨上入覆于棺故云加加斧于槨上也畢塗屋者畢盡也斧覆既竟又四柱為屋覆上而四面盡塗之也天子之禮也

甸師喪事代王受

青裁

梁盛者祭祀之主也今國遭大喪若云此黍稷不馨使鬼神不逞于王既殯太祝作禱辭授甸人使

以禱籍田之神受青裁弭後歿疏曰言喪事者謂主喪既殯後甸師氏于太祝取禱詞禱籍田之神青過也代主受過裁止後歿故為此禱也太祝作禱詞在既殯後者見太祝職云授甸人禱詞在大歛後大歛則殯故知在既殯後

太祝大喪言甸人讀禱

言猶語也禱六辭之屬禱也甸人喪事代

王受青裁太祝為禱辭授之使以禱于籍田之神也疏曰太祝掌六辭五曰禱故于王既殯作禱銘甸人使

以禱

小祝設熬置銘

疏曰熬謂熬穀殯在堂時設於棺旁所以感蚍蜉云置銘者銘

謂銘旌書死者名既殯
置于西階上所以表柩

右殯

天子諸侯之喪斬衰者奠

為君服皆斬衰唯主人不奠
疏曰按士喪禮主人不親

奠而此下文之士則朋友奠故知主人不親奠也
主人不親奠者以主人悲號思慕不暇執事故也

右大歛奠

小宗伯辨吉凶之五服 司服掌王之吉凶衣服凡凶

事服弁服

服弁喪冠也其
服斬衰齊衰

凡喪為天王斬衰為王后齊

衰

王后小君也諸
侯為之不杖暮

太僕喪紀正王之服位詔法儀

詔
告

也

內司服凡祭祀賓客共后之衣服及九嬪世婦凡

命婦共其衣服共喪衰亦如之

疏曰外命婦喪衰謂王服齊衰於后無服若九

婦以下及女御于王服斬衰于后服齊衰也

天官

追師

追丁回反一曰雕追治玉石之名

掌

王后之首服為九嬪及外內命婦之首服以待祭祀賓

客喪紀共筭經亦如之

天官

內宰凡喪事佐后使治外

內命婦正其服位

使其屬事之上士內命婦謂九嬪世婦女御鄭司農云外命婦卿大夫之

妻王命其夫后命其婦元謂士妻亦為命婦疏曰凡

有喪事內宰皆佐后使其屬官治外內之命婦正其服

之精粗位之前後也諸子大喪正羣子之服位

疏曰位謂在殯宮外內哭位也

正其服者公卿大夫之子為王斬衰與父同故雜記大夫之子得行大夫禮

肆師禁外內

命男女之衰不中法者且授之杖

外命男六卿以出也內命男朝廷卿大夫

士也其妻為外命女喪服為夫之君齊衰不杖內命女王之三夫人以下不中法違升數與裁制者鄭司農云三日授子杖五日授大夫杖七日授士杖此舊說也喪大記曰君之喪三日子夫人杖五日既殯授大夫世婦杖無七日授士杖文元謂授杖日數王喪依諸侯與七日授士杖四制云疏曰外內命男女為王雖有齊斬不同其衰皆有升數多少及裁制故禁之使依法也授之杖者外內命男及內命女皆為王斬者有杖授之其外命女為王齊衰無杖故云且者見不定之詞也喪服為夫之君見喪服不杖齊衰章內命女三夫人以下者通九嬪二十七世婦八十一御妻皆為王斬衰而杖也言升數者諸臣妻為夫之君義服衰六升諸臣為王義

服斬衰衰三升半冠六升三夫人以下為王正服斬衰
衰六升是其數也言裁制者喪服云凡衰外削幅裳內
削幅幅三掬已下具有裁制也司農所云授杖之日仍
是四制之文也王喪諸臣等無授杖之日數以諸侯之
臣與王之臣同斬衰杖竹故授杖日數亦宜同也檀弓
云天子崩三日祝先服明子與夫人亦服則天子之子
及后亦服矣五日官長服明天子三公已下及三夫人
已下亦服矣但服杖同時有服即杖矣唯天子服授杖
亦當七日矣是以王

天子崩三日祝先服

祝佐含斂
先服疏

曰祝大祝也服服杖也是喪服之數故呼杖為服祝
佐含先病故先杖也然云祝服故子亦三日而杖也五

日官長服

官長大夫士疏曰官長大夫士
也亦服杖也病在祝後故五日也

七日國中

男女服

庶人疏曰國中男女謂畿內民及庶人在官
者服謂齊衰三月而除之必待七日者天子七

日而殯殯後嗣王成
服故民得成服也
三月天下服
諸侯之大夫
疏曰

之大夫為王總喪既葬而除之也近者亦不待三月今據遠者為言耳然四條皆云服何以知其或杖服或裹服按喪大記云君之喪三日子夫人杖五日既殯授大夫世婦杖又喪服四制云三日授子杖五日授大夫杖七日授士杖按如大記及四制則知今云三日五日服杖明矣其七日及三日者唯服而已無杖四制云七日授士杖此云五日士杖者士若有地德深則五日若無地德薄則七日崔氏云此據朝廷之士四制是邑宰之士也

君之喪三日子夫人杖五日既殯授大夫

檀弓

世婦杖

三日者死之後三日也為君杖不同日人君禮大可以見親疏也疏曰熊氏云子杖通女子

子在室者若嫁為他國夫人則不杖嫁為卿大夫之妻與大夫同五日杖也君之女及內宗外宗之屬嫁為士

妻及君之女御皆七日杖也喪大記

公之喪諸達官之長杖

謂君所命雖有官職

不達于君則不服斬疏曰達官謂國之卿大夫士被君命者也不達于君謂府史之類賤不被命是不達于君也不服斬衰但齊三月耳故喪服齊衰三月章有庶人為國君即此是也

右成服

天府凡國之王鎮大寶器藏焉若有大祭大喪則出而

陳之既事藏之

玉鎮大寶器玉瑞玉器之美者禘祫及大喪陳之以華國顧命陳寶赤刀大訓

弘璧琬琰在西序大玉夷玉天球河圖在東序允之舞衣大貝鼗鼓在西房允之戈和之弓垂之竹矢在東房此其行事見于經

典路若有大祭祀則出路贊駕說大喪亦

如之

亦出路當陳之書顧命陳先王寶器入曰大輅在賓階面綴路在阼階面先路在左塾之前次路在

右塾

之前

右陳寶器

顧命成王崩康王麻冕黼裳由賓階墜入即位云云

詳見

上大康王既尸天子遂誥諸侯云云

詳見上文

成湯既沒伊

尹奉嗣王祇見厥祖云云

詳見上文

春秋文公九年毛伯

來求金何不稱使當喪未君也踰年矣何以謂之未君

據崩在八年

踰年即位即位矣而未稱王也未稱王何以知其即

位以諸侯之踰年即位亦知天子之踰年即位也以天

子三年然後稱王亦知諸侯於其封內三年稱子也踰

年稱公矣則曷於其封內三年稱子緣終始之義一年

不二君

故君薨稱子其既葬稱子

緣臣民之心不可曠年無君

故踰年稱

公緣孝子之心則三年不忍當也

不忍當公位

傳又按曲禮曰天

公羊

子未除喪曰予小子注云謙未敢稱一人春秋傳曰以諸侯之踰年即位亦知天子之踰年即位以天子三年然後稱王亦知諸侯於其封內三年稱子疏曰天子踰年即位無文約魯十二公諸侯三年內稱子亦無文約天子踰年不稱王也是天子諸侯互相明也又準左傳之義諸侯薨而嗣子即位凡有三時一是始喪即適子

之位二是踰年正月即一國正君臣之位三是除喪而見于天子天子命之嗣列為諸侯之位今此踰年即位是遭喪明年為元年正月即位白虎通云父沒稱子某屈于尸柩也既葬稱子者即尊之漸也踰年稱公者緣臣之心不可一日無君緣始終之義一年不二君故踰年即位係臣民之心也

文公元年春

王正月公即位

先君未葬而公即位不可曠年無君疏曰諸侯之禮既葬成君先君雖未葬

既踰年而君即位不可曠年無君故也釋例云遭喪繼立者每新年必改元正位百官以序故國史書即位于策以表之文公成公先君之喪未葬而書即位因三正之始明繼嗣之正表朝儀以固百姓之心此乃國君明分制之大禮譬周康王麻冕黼裳以行事事畢然後反喪服也杜引顧命康王之事以譬此者彼是既殯此是踰年雖時不同取其暫服吉服事相似耳又按釋例曰尚書顧命天子在殯之遺制也推此亦是以準諸侯之

禮矣

定公元年夏六月公之喪至自乾侯戊辰公即位

諸侯薨五日而殯則嗣子即位癸亥昭公喪至五日殯于宮定公乃即位疏曰公羊穀梁皆云正棺于兩楹之間然後即位按正棺兩楹之間即禮所謂夷于堂者也喪大記君薨之禮云既小斂男女奉尸夷于堂鄭元云士之既殯諸侯之小斂于死者俱三日戊辰去癸亥五日非正棺之日不得為正棺即位也雜記云諸侯行而死歸至于廟門遂入適所殯鄭元云適所殯謂兩楹之間自外來者正棺于兩楹之間尸亦夷之于此因殯焉殯必于兩楹之間者以其死不予室而自外來留之於中不忍遠也鄭取二傳之說言死從外來者殯在兩楹之間若謂殯為正棺則與杜言合矣

癸亥公之喪至自乾侯則曷為以

戊辰之日然後即位正棺於兩楹之間然後即位

公羊傳

沈子曰正棺乎兩楹之間然後即位也內之大事日即位君之大事也其不日何也以年決者不以日決也此

則其日何也踰年即位厲也

厲危也公喪在外踰年六月乃得即位危故日也

於厲之中又有義焉

先君未葬則後君不得即位

未殯雖有天子之

命猶不敢況臨諸臣乎

以輕喻重也雖為天子所召不敢背殯而往况君喪未葬而行

即位之禮以臨諸臣乎背音佩

周人有喪魯人有喪周人弔魯人不弔

周人曰固吾臣也使人可也魯人曰吾君也親之者也

使大夫則不可也君至尊也去父之殯而往弔猶不敢

況未殯而臨諸臣乎

穀梁傳

月正元日舜格于文祖

正月

正月元日上日也舜服堯喪三年畢將即政故復至文祖廟告文祖者堯文德之祖廟

惟三祀

十有二月朔伊尹以冕服奉嗣王歸于亳

冕冠也踰月即吉服

右嗣君即位

勉齋黃氏曰按即位之別有四正嗣子之位已見始死條下顧命有王麻冕黼裳道揚末命及康王之誥有惟予一人釗報誥之語乃既殯之後嗣君即繼體之位之禮今附見於此若踰年合正改元

之位三年合正踐祚之位如春秋元年書即位則是踰年正改元之位也月正元日舜格于文祖伊尹以冕奉鬯王歸於亳則是三年正踐祚之位也然崩薨之日或在歲終則蓋有未殯而踰年者矣故踰年正繼體之位之禮遂無所附喪大記補經亦止于虞禮則三年之禮亦無所附今併列於此記之下其義則見於春秋傳注疏與喪禮及白虎通之說所當通考也

居倚廬不塗君為廬宮之大夫士禮之

宮謂圍障之也禮袒也謂不障

疏曰此論初遭喪君大夫士居廬之禮居倚廬者謂于中門之外東墻下倚木為廬故云居倚廬不塗者但以草夾障不以泥塗之也君為廬宮之者謂廬外以帷障之如宮墻大夫士禮之者禮袒也其廬袒露不帷障也按既夕禮注云倚木為廬在中門外東方北戶喪大記

宮正大喪則授廬舍

辨其親疎貴賤之居

廬倚廬也舍聖室也親者貴者居倚廬疎者賤者居聖室雜記曰大

夫居廬士居聖室

疏曰云廬倚廬也者謂于門之外

東壁倚木為廬云舍聖室也者舍對廬為聖室聖室者

兩下為之與廬異故云聖室也云親者貴者居倚廬者

親謂大功以上貴謂大夫已上者居倚廬云疎者賤者

居聖室者疏謂小功總麻賤謂士二者居聖室知義如

此者以其經云辨其親疎貴賤明當如此解之也又引

雜記者彼是諸侯之臣其大夫居廬士居堊室
彼注士居堊室亦謂邑宰也朝廷之士亦居廬

右喪廬

巾車王之喪車五乘木車蒲蔽大禭尾纍疏飾小服皆

疏

木車不漆者鄭司農云蒲蔽謂羸蘭車以蒲為蔽天

子

喪車之儀漢儀亦然大禭以大皮為覆笭故書疏

為

摺杜子春讀摺為妙元謂蔽車旁禦風塵者大白大

皮

既以皮為覆笭及其尾為戈戟之弣羸布飾二物

之

側為之緣若攝服云服讀為箠小箠劍短兵之衣

此

始遭喪所乘為君之道尚微備奸臣也書曰以虎賁

百人

逆子釗亦為備焉羸魯火反劉又音果笭力丁

反

劉入音冷摺本又作摺同思如反弣吐刀反緣悅絹

反

下同素車焚蔽大禭素飾小服皆素素車以白土堊

蔽音服

素車焚蔽大禭素飾小服皆素素車以白土堊

車也焚讀為熾

麻以為蔽其禠服以素繒為緣此卒哭所乘為君之道益著在車可以去戈戟 茀扶文反 藻車藻

蔽鹿淺禠草飾

故書藻作蔽杜子春蔽讀為華藻之藻直為華藻也元謂藻水草蒼色以蒼土

壘車以蒼繒為蔽也鹿淺禠以鹿夏皮為覆苓又以所治去毛者緣之此既練所乘 輶音總又音藻李一音

蒼會反

駟車翟蔽然禠髮飾

故書駟作龍駟為駟軟讀為忝也元云龍讀為駟軟讀為忝也元

謂駟車邊側有漆飾也翟細葦席也以為蔽者漆則成藩即吉也然果然也髮亦多黑少之色韋也此大祥所乘翟音九髮香求反軟音次 漆音次來音七垓胡詵反 漆車藩蔽駢禠雀飾 漆車

也藩今時小車藩漆席以為之駢胡罕反雀黑多赤少之色韋也此禫所乘

右喪車

外宗大喪則叙外內朝莫哭者

內外宗及外命婦曰經直云外內鄭云內疏

外宗及外命婦則內中以兼外宗外中不兼內命婦也經不云內外宗內外命婦者意欲見內是內宗舉內以見外其外中則不得舉外以見內以其內命婦九嬪叙之也故九嬪職云大喪師叙哭者注云后哭衆乃哭內命婦九嬪叙之故鄭亦不言內命婦春官

世婦大喪比外內命婦之朝

莫哭不敬者而苛罰之

苛譴也疏曰大喪謂王喪殯後有朝夕哭事外命婦朝廷卿

大夫士之妻內命婦九嬪以下以尊卑為位而哭而有

不敬者則呵責罰之春官哭位條內有天子之喪

別姓而哭肆師令序哭內宗序哭九嬪師序哭位此條通用當互考朝夕哭不帷緣孝

欲見殯殯也既踊則施其

士偯入而后朝夕踊

備猶盡也

國君之喪嫌主人哭入則踊疏曰此一節論君喪羣臣朝夕踊哭之事倘盡也國君喪嗣國孝子雖朝夕先入即位哭必待諸臣皆入列位畢後乃俱踊者也士畢最後故舉士入于畢也所入有前後而相待踊者孝子哀深故前入也踊須相視為節故俟齊也

右朝夕哭

司服大喪共其奠衣服

奠衣服今座上菟衣也疏曰守祧職云遺衣服藏焉鄭云大

斂之餘也至祭祀之時則出而陳于座上此則奠衣服者也陳小斂奠條內有封人飾牛牲等七官又陳大斂條內有司几筵設葦席素几皆此條所通用此條後凡奠通用當互考

右朝夕奠

遵人喪事共其薦遵羞遵

謂殷奠時

疏曰殷猶大也

大奠朔月月半薦新祖奠遣

奠之類也

按士喪禮月半不殷奠注云士月半不復

如朔月盛奠下等者疏云下遵者以下大夫以上有月

半奠故士禮月半不殷奠而此有月半奠也

陳小斂條內有封人等七官陳大斂條內有司几筵設葦席素

几朝夕奠條內有司服共奠衣服皆

此條通用此條凡後殷奠通用當考

天子諸侯之喪

斬衰者奠

註見前


右朔月月半殷奠

按儀禮正經所載惟士喪禮而天子諸侯大夫之

禮闕焉勉齋黃氏著儀禮經傳通解因小戴喪大

記一篇合周禮禮記諸書以補其闕然後粲然可
考今所叙國恤於黃氏禮書中撮取其專言天子
喪禮處次第其節奏如前以見三代國哀之制然
禮記所言君皆國君也其專言天子者無幾而注
疏家以諸侯之禮通之於天子亦可槩見周禮所
言雖皆天子之禮然惟職掌所及則載之而不闕
於職掌者無可考則亦豈無遺軼姑叙其所可知
者爾自始死至殷奠叙于此而卜宅以至窆虞則

叙于山陵條下至于與臣民通用之禮則自有黃
氏專書更不贅述



文獻通考卷一百二十